

CARTA YEⁿ'E 'IIⁿ'YĀⁿ HEBREOS

Ndyuūs dichó'o yā daiyá yā chi caaⁿ'máⁿ yā lado yeⁿ'é yā

¹ Tiempo chi 'āā chó'ōo, Ndyuūs caⁿ'a yā n'deeē cūūví tiempo ndúúcū neenē n'deeē nááⁿ taachi profetas chí candεé yā nduudu yeⁿ'e Ndyuūs ngaⁿ'á yā lado yeⁿ'é yā. ² Ní maaⁿ ní tiempo 'cūū Ndyuūs dichó'o yā daiyá yā Jesucristo chí ngaⁿ'á yā ndúúcū s'uuúⁿ. Ní Ndyuūs ndúúcū daiyá yā din'dái yā tanducuéⁿ'ē chí vée ní Ndyuūs ca'á yā tanducuéⁿ'ē chí yeⁿ'ē daiyá yā. ³ Ní daiyá Dendyuūs miiⁿ ní ngú n'gai yā yeⁿ'ē chidεεvé n'dai yeⁿ'é Ndyuūs. Ní tan'dúúcā Ndyuūs miiⁿ 'āā 'tiicá nūuⁿ daiyá yā. Daiyá yā ní ndúúcū nduudu chí ngaⁿ'a yā, dííⁿ yā chí tanducuéⁿ'ē dendu'ū snée na lugar yeⁿ'ē. Ní cuayiivi chí daiyá yā dííⁿ yā chí nadach'εεcú yā yeⁿ'e 'iiⁿ'yāⁿ yeⁿ'e nuuⁿndi yeⁿ'é yā tuu'mi ní ch'iindí yā ná va'ai chεεti nguuvi na lado tá cuaacú chiidá yā chí lado yeⁿ'e honor. Ndyuūs miiⁿ ní poder chí ch'εεte ca yeⁿ'ē tanducuéⁿ'ē poder.

Daiya Ndyuūs ní ch'εεte ca nguée ti ángeles

⁴ Ní daiya Dendyuūs ní neenē ch'εεte ca nguée ti ángeles. Ní chí duuchí yā ndúúcū chí vée yeⁿ'é yā ní neenē ch'εεte ca nguée ti ángeles. ⁵ Caati mar 'áámá vmnéⁿ'ēe nguée caⁿ'a Ndyuūs ndúúcū mar 'áámá ángel tan'dúúcā chí ngaⁿ'a yā ndúúcū daiyá yā Jesucristo:
Díí ní daiyá; maaⁿ ca'á vida yeⁿ'é nī.

- Ní nguée caⁿ'a yā ndúúcū mar 'áámá ángel 'tíicā:
 'Úú ní chiida di 'úú; niicu díi ní daiyá dii. ⁶ Ní taachi
 Ndyuūs dichó'o yā 'áámá n'dyaⁿ'ā daiyá yā
 iⁿ'yeeⁿdí 'cūū ngaⁿ'a yā 'tíicā:
 Nducyaaca ángeles yeⁿ'é Ndyuūs canée chi dich'εεté
 yā daiya Ndyuūs. ⁷ Ní Ndyuūs ngaⁿ'a yā yeⁿ'e
 ángeles yeⁿ'e yā 'tíicā:
 'Úú diiⁿ chi ángeles yeⁿ'é ní tan'dúúicā espíritu s'eeⁿ,
 'tiicá yā. Ní diiⁿ chi ángeles dichí'vε yā
 'úú. Ní tan'dúúicā 'áámá nguuchi yaⁿ'ā 'tíicā
 ángeles yeⁿ'é. ⁸ Naati Ndyuūs ngaⁿ'á yā yeⁿ'e
 daiya yā Jesucristo 'tíicā:
 Dii Ndyuūs, trono yeⁿ'e di ni 'áámá cūnee. Ní ngaⁿ'a
 ntiiⁿnyuⁿ di yeⁿ'ē tanducuéⁿ'ē ndúúcū vaadi
 cuaacu.
⁹ Dii ní neⁿ'e di cosas chi cuaacu, ní nguée neⁿ'e
 di chεε chi nguée cuaacu. Cucáávā chuū
 Ndyuūs yeⁿ'e di chi chiida di ní tee yā dii
 vaadi yeenu taavi nguée ti ca'a yā 'iiⁿ'yāⁿ chi
 yeⁿ'é nī. ¹⁰ 'Tiicá ntúūⁿ Ndyuūs ngaⁿ'a yā
 yeⁿ'ē daiyá yā Jesucristo:
 Díi, Señor, ndii cuááⁿ vmaaaⁿ s'núuⁿ di cimientu
 yeⁿ'e iⁿ'yeeⁿdí 'cūū, ní din'dái di nanguuvi
 ndúúcū ta'a di.
¹¹ Iⁿ'yeeⁿdi ndúúcū nánguuvi ní dí'cuiinu naati díi
 'áámá cūnee di. Ní tanducuéⁿ'ē chuū cuuvi
 ndiicúū tan'dúúicā catecaí yú, 'tíicā ndiicúū.
¹² Ní diiⁿ nī n'cánnduu nī nducuéⁿ'ē tan'dúúicā
 'iiⁿ'yāⁿ diiⁿ yā chí n'cannduu yā catecaí
 yā. Ní n'daaⁿ di nducuéⁿ'ē tan'dúúicā 'iiⁿ'yāⁿ
 n'daaⁿ yā catecaí yā. Naati dii Jesucristo
 daiyá Ndyuūs 'āā daamá nūuⁿ canee di
 nduuyu nduuyu. Ní 'áámá cūnee di cueⁿ'e

daāⁿmaⁿ. ¹³ Ndyuūs nguée caⁿ'á yā mar 'áámá ángel mar 'áámá vmnéⁿ'ēe tan'd'úúcā chi ngii yā daiyá yā Jesucristo 'tíicā:

'Cuūndī di lado ta cuaācú ndíí 'úú dííⁿ chi nducyaacá yā chi taáⁿ yā yeⁿ'ē di canée yā maaⁿ ca'a di tan'dúúcā 'áámá banco 'líí 'tíica yā chí chεé dí yeⁿ'é yā. ¹⁴ Nducyaáacá ángeles ní espíritu s'eeⁿ chi dííⁿ yā ntiíⁿnyuⁿ yeⁿ'é Ndyuūs. Ní Ndyuūs dichó'o yā ángeles chí innee yā 'iiⁿ'yāⁿ na iⁿ'yeeⁿdí 'cūū chi Ndyuūs nadinguáⁿ'ai yā.

2

Canée chí diíⁿ yú cuidado yeⁿ'e chi Ndyuūs nadanguáⁿ'ai yā s'uuúⁿ

¹ Ní cucáāvā chi Cristo nadanguáⁿ'ai yā s'uuúⁿ canée chí candεε yú cuidado yeⁿ'é nduudu cuaacu chí n'giindiveeⁿ yú ti nguée i'neeⁿ yú cucáāvā nduudu chí n'daaⁿ ní maaⁿ ní nguée caⁿ'a yú táámá yúúní. ² Nduudu cuaacu chí 'āā ngaⁿ'a ángeles ní nduudu chí ch'iⁿ'i nanááⁿ 'iiⁿ'yāⁿ chí cuaacu nííⁿnyúⁿ chí nduudu cuaacu. Ní 'iiⁿ'yāⁿ chí nguée n'giindiveeⁿ yā nduudu cuaacu miiⁿ ní v'ée nuuⁿndi yeⁿ'é yā 'āā cūneé yā na castigo caati 'tíicā cuuvi. ³ Ní maaⁿ ní ¿táácā cuuví nanguaⁿ'āi s'uuúⁿ yeⁿ'e castigo nduuti chí nguée diíⁿ yú cuidado yeⁿ'ē chí nadanguáⁿ'ai yā s'uuúⁿ? Vmnaáⁿ vmaaaⁿ Señor Jesucristo ngaⁿ'á yā chí nadanguáⁿ'ai yā 'iiⁿ'yāⁿ. Cuayíivi miiⁿ ní 'iiⁿ'yāⁿ chí ch'iindiveeⁿ yā nduudu miiⁿ dííⁿ yā ch'iⁿ'í yā s'uuúⁿ ndúúcū pruebas chí nduudu miiⁿ ní nduudu cuaacu. ⁴ 'Tiicá ntúūⁿ tiempo maaⁿ Ndyuūs ch'iⁿ'í yā s'uuúⁿ chí cuaacu chí nduudu miiⁿ ní cuaacu caati dííⁿ yā señas

ndúúcū vaadī n'giinu chi ch'εεε. Ní ch'i'n'í yā poder ye'n'é yā ní diín yā milagros. Ní ca'a yā n'deeē n'dái ntii'nyuⁿ ye'n'é Espíritu N'dai ye'n'é yā 'ii'n'yāⁿ chi ye'n'e yā caati 'tíicā ne'n'é yā diiⁿ yā.

Jesucristo ch'iindiyáaⁿ yā tan'dúúcā 'áamá sa'n'ā ye'n'e ín'yee^{ndī}

⁵ Ndyuūs nguéé cuuvi s'neéⁿ yā chi ángeles miiⁿ nga'n'á yā ntii'nyuⁿ ye'n'e ín'yee^{ndī} chi cuayivi ca'n'á yā din'dái yā. Ní ye'n'e ín'yee^{ndī} miiⁿ chíiⁿ chi nga'n'a yú. ⁶ Nguéé diín yā 'tíicā. Ná libro ye'n'e Ndyuūs chi canéé nguūⁿ ní 'áamá yā nga'n'a yā 'tíicā:

N'dii, Ndyuūs, ¿d'é'ē chi sa'n'ā s'eeⁿ chi snéē na ín'yee^{ndī} 'cūū chi nan'gaacu nī ye'n'ē sa? ¿D'é'ē chi sa'n'ā s'eeⁿ chi snéē na ín'yee^{ndī} 'cūū chi diín nī cuidado ye'n'e sa'n'ā s'eeⁿ?

⁷ Ta 'líiⁿ tiempo nūuⁿ n'dii, Ndyuūs, s'neéⁿ nī sa'n'ā Daiyá nī chi nguéé ch'εεε cá yā tan'dúúca ángeles. Ní teé nī sa'n'ā daiyá nī chi ch'εεé yā ndúúcū honra ye'n'é yā tan'dúúcā chi sa'n'ā rey 'tíica yā. Ní chi'néⁿ nī sa'n'a miiⁿ chi caa'n'maⁿ ntii'nyuⁿ yā ye'n'e tanducué^{n'ē} chi nadin'dái nī.

⁸ Ní s'neéⁿ nī tanducué^{n'ē} dendu'ū maaⁿ ta'á yā. Ní 'tíica rā va ti Ndyuūs s'neéⁿ yā tanducué^{n'ē} dendu'ū chi sa'n'ā miiⁿ caa'n'máⁿ yā ntii'nyuⁿ ye'n'ē. Maaⁿ ní nguéé inaaⁿ yú chi sa'n'ā miiⁿ nga'n'a ntii'nyúⁿ yā ye'n'e tanducué^{n'ē}. ⁹ Naati maaⁿ ní snaaⁿ yú chi Ndyuūs diín yā chi Jesucristo nguéé ch'εεé yā tan'dúúcā ángeles dúú'ví tiempo nūuⁿ. Ní Ndyuūs neene ya'ai 'iinú yā 'ii'n'yāⁿ ye'n'e ín'yee^{ndī} 'cūū chi ne'n'é yā chi Jesucristo ch'iī yā lugar ye'n'e

nducyaaca yú. Maaⁿ ní véé δεεvé yeⁿe Jesucristo ní véé honra yeⁿé yā cucáāvā chí ch'īi yā na cruz.

10 Ní Ndyuūs din'dái yā tanducuéⁿē dendu'ū ní diiⁿ yā cuidado yeⁿē. Ní n'daacā diiⁿ Ndyuūs taachi diiⁿ chí Jesucristo miiⁿ ní saⁿā perfecto yā chí chichéé yā yeⁿe nducuéⁿē chí n'geenu yā ngii. Ní Ndyuūs n'diichí yā chí n'daacā idiíⁿ yā. 'Tíicā diiⁿ Ndyuūs caati cuuvi yeⁿé yā n'deee n'dái daiyá yā. Ní cuuvi ca'a yā 'iiⁿyāⁿ s'eeⁿ parte chí cuuvi yeⁿé yā ndúúⁿcū vaadī δεεεε n'dai yeⁿé yā. Jesucristo ní saⁿā chí nadanguáⁿai yā 'iiⁿyāⁿ yeⁿe iⁿ'yeeⁿdí 'cūū. 11 Ní Jesucristo ní didεεvé yā 'iiⁿyāⁿ yeⁿe nuuⁿndi yeⁿé yā ní 'iiⁿyāⁿ chí ndúúⁿví δεεvé yā ní tan'dúúⁿcā Jesucristo miiⁿ. Véé 'áámá nūuⁿ chiida nducyaaca 'iiⁿyā. Cáāvā chuū Jesucristo nguéé 'cuinaán yā chí caaⁿmán yā chí 'iiⁿyāⁿ s'eeⁿ ní ví'i yā. 12 Ní 'tíicā Jesucristo ngaⁿá yā ngii yā 'iiⁿyāⁿ s'eeⁿ ní canéé nguūⁿ:

N'diī Ndyuūs, 'úú caaⁿmán yeⁿé n'diī nanáán hermanos yeⁿé ní caátá himnos chí cantos chí ngaⁿā chí ch'εεté nī nanáán 'iiⁿyāⁿ yeⁿé nī taachi nduuvidaamá yā. 13 Taama vmnéⁿēe Jesucristo caⁿa yā 'tiicā:

'Úú ní canéé confianza yeⁿé ndúúⁿcū Ndyuūs.

Ní táámá caⁿa yā:

'Muuⁿ caneé ndúúⁿcū daiyá chí Ndyuūs tee yā 'úú.

14 'Tíicā, 'iiⁿyāⁿ yeⁿe 'áámá familia ní 'áámá yuūtē yeⁿé yā ní 'áámá yuūuⁿ ntúūⁿ va. Ní 'tiicā ntúūⁿ Jesucristo miiⁿ ch'iindiyáaⁿ yā ndúúⁿcū cuerpo ndúúⁿcū yuūúⁿ tan'dúúⁿcā s'uuúⁿ. Ní 'tiicā ntúūⁿ Jesucristo ch'īi yā caati cuuvi di'cuiinú yā yááⁿn'guiinūuⁿ caavā chí diiⁿ sa chí nducyaaca yú

ní n'gii yú. ¹⁵ 'Tiicá ntúūⁿ Jesucristo dííⁿ yā chi nguéé 'va'a yú yeⁿ'e tiempo chí 'cuūvi yú. ¹⁶ Cuaacu chí Jesucristo nguéé ndaá yā nanááⁿ ángeles chí chinnee yā ángeles naati nanááⁿ 'iiⁿ'yāⁿ yeⁿ'e ndaata yeⁿ'e Abraham cáávā chí nadanguáⁿ'ai yā 'iiⁿ'yāⁿ. ¹⁷ Cáávā chuū Jesucristo canéé chí ch'iindiyáaⁿ yā tan'dúúcā nducyaaca hermanos yeⁿ'é yā ní 'íicú maáⁿ yā cuuvi cūneé yā chiiduú ch'εεε ca chí 'áámá cānee yeⁿ'e ntiiⁿ'nyuⁿ yeⁿ'e Ndyuūs. Ní ya'ai 'iinú yā 'iiⁿ'yāⁿ. Ní 'íicú cuuví nadach'εεcú yā nuuⁿ'ndi yeⁿ'e 'iiⁿ'yāⁿ ti nadíí'vε yā nducuéⁿ'ē nuuⁿ'ndi yeⁿ'e 'iiⁿ'yāⁿ. ¹⁸ Ní Jesucristo maáⁿ yā ch'eenú yā chíí ní chichεε yā taachi ndaá yááⁿ'nguiniūⁿ chí n'diichineeⁿ sa 'yā. Ní cáávā chuū maaⁿ ní Jesucristo cuuvi cūnnee yā 'iiⁿ'yāⁿ s'eeⁿ taachi n'geenú yā ngii ní nadanguáⁿ'ai yā 'iiⁿ'yāⁿ s'eeⁿ yeⁿ'e yááⁿ'nguiniūⁿ taachi ndaa sa n'diichineeⁿ sa 'iiⁿ'yāⁿ s'eeⁿ.

3

Jesucristo ní ch'εεε taavi cá yā nguéé ti Moisés

¹ Ndís'tiī, hermanos yeⁿ'ē yú chí Cristo didεεvé yā ní ndís'tiī ntúūⁿ Ndyuūs yaa'ví yā ndís'tiī chí cuuvi yeⁿ'é yā. Maaⁿ ní nadicádíínuuⁿ n'dai nī yeⁿ'e Jesucristo chí apóstol chí dichó'o Ndyuūs ti Jesucristo miiⁿ ní chiiduú ch'εεε cá yeⁿ'é 'iiⁿ'yāⁿ chí i'téenu yā Jesucristo tan'dúúcā s'uuúⁿ. ² Jesucristo miiⁿ 'áámá caneé yā ndúúcū Ndyuūs ní dííⁿ yā tanducuéⁿ'ē dendu'ū. Ní dííⁿ yā tanducuéⁿ'ē dendu'ū chí Ndyuūs dineⁿ'é yā. Ní tan'dúúcā Moisés din'daacá yā ntiiⁿ'nyuⁿ chí Ndyuūs ca'a yā, 'tiicá ntúūⁿ Jesucristo din'daacá yā tanducuéⁿ'ē ntiiⁿ'nyuⁿ yeⁿ'ē

va'ai ye^{n'é} Ndyuūs chi Ndyuūs ca'a yā. ³ Ní 'áámá 'ii^{n'yā} chi din'dái yā 'aama va'āi ní ch'εεε cá yā nguéé ti va'āi miiⁿ. 'Tíicā Jesucristo ní ch'εεε taavi cá yā nguéé ti Moisés. ⁴ Deenu yú chi véé 'ii^{n'yā} chi din'dái yā ca'áámá cā'aama va'āi naati Ndyuūs din'dái yā nducué^{n'ē} dendu'ū chi véé. ⁵ Moisés miiⁿ dichí^{vε} yā Ndyuūs ní n'dááca taavi idiⁿ sa ntii^{n'nyu} ye^{n'ē} vaacu Ndyuūs. Ní Moisés diⁿ yā ntii^{n'nyu} chi nga^{n'a} yā nduudu ye^{n'é} Ndyuūs chi Ndyuūs ca^{n'a} yā chi caa^{n'mán} yā cuayi-ivi. ⁶ Naati Cristo chi daiyá Dendyuūs ni 'áámá diⁿ yā ntii^{n'nyu} ti 'ii^{n'yā} ndii tíⁿ yā ye^{n'e} vaacu Dendyuūs. Ní s'uuúⁿ tan'dúúicā vaacu Ndyuūs 'tíicā s'uuúⁿ nduuti chi canéé diitu yú ndúúcū chi i'teenu yú. Ní yeenu yú ndúúcū chi cuuvi ye^{n'e} yú ndíi tiempo chi 'cuūvi yú.

Véé tiempo chi ntaavi'tuunúūⁿ 'ii^{n'yā} chi ye^{n'é} Ndyuūs

⁷ Ní chuū Espíritu N'dai ye^{n'é} Ndyuūs nga^{n'a} yā 'túúicā naachi canéé nguūⁿ na libro ye^{n'é} Ndyuūs: Maaⁿnguuvvi miiⁿ nduuti chi ndís'tiī 'caandiveéⁿ nī nduudu ye^{n'é} Ndyuūs:

⁸ Nguéé dichεεchí nī staava ye^{n'é} nī chí ditaán nī tan'dúúicā chi diⁿ 'ii^{n'yā} tiempo chi 'āā chó'ōo taachi 'ii^{n'yā} s'eeⁿ diⁿ yā n'diichineéⁿ yā Ndyuūs ndúúcū nuuⁿndi chi diⁿ yā na yá^{n'āa} cuuⁿmáⁿ naachi nguéé ch'εεtinéé 'ii^{n'yā}. ⁹ Ní Ndyuūs nga^{n'á} yā ngīi yā 'ii^{n'yā}:

Tiempo chi chó'ōo na yá^{n'āa} cuuⁿmáⁿ naachi nguéé ch'εεtinéé 'ii^{n'yā}, 'ii^{n'yā} s'eeⁿ ye^{n'ē} ndaata ye^{n'é} nī n'diichinééⁿ ntúuⁿ yā 'úú 'áará chí

n'diichí yā nducuéⁿē chi 'úú diiⁿ ndúúcu yā 'naaⁿ chí 'uūvī nγεεcu nduuyū.

10 Ní cáávā chuū 'úú, Ndyuūs, ditaáⁿ ndúúcu 'iiⁿ'yāⁿ s'eeⁿ. Ní 'túúcā ngaⁿ'á ngī 'iiⁿ'yāⁿ s'eeⁿ: Ndis'tiī, nducuéⁿē tiempo nguéeⁿ n'daacā nadacadíínuuⁿ nī na staava yeⁿ'é nī. Ní nguéeⁿ n'diichí nī yúúní yeⁿ'é.

11 Ní cáávā chi diiⁿ 'iiⁿ'yāⁿ s'eeⁿ 'úú ní nguéeⁿ canee yiinú yeⁿ'e yā ní caⁿ'a 'túúcā: Cuáácú chí 'iiⁿ'yāⁿ s'eeⁿ nguéeⁿ cuuví ndaa yā naachi canée chí ntaavi'tuunúūⁿ 'iiⁿ'yāⁿ yeⁿ'e ndaata yeⁿ'é nī.

12 Maaⁿ ní ndís'tiī, hermanos yeⁿ'é, cundée nī cuidado chi nguéeⁿ 'áámá ndís'tiī chí nguéeⁿ n'daacā staava yeⁿ'é nī chí nguéeⁿ i'téenu nī ní nguéeⁿ divíi nī yeⁿ'é Ndyuūs chí canduuchi. 13 Ní ndís'tiī ní yaa'ví nī ví'i nī 'áámá nī taama nī nguuvi nguuvi taachi maaⁿnguuvi ní 'íícú mar 'áámá ndís'tiī nguéeⁿ dichεεchí nī staava yeⁿ'é nī cáávā nuuⁿndi chí nginnche'eī ndís'tiī. 14 Ní véé 'áámá cuaaⁿ yeⁿ'é yú ndúúcu Cristo nduuti chí s'uuúⁿ ní 'áámá canee yú ndúúcu chí i'téenu yú vmnááⁿ vmnaaⁿ yeⁿ'e Cristo ndíi tiempo chí 'cuūvi yú.

15 'Tíícā canée nguūⁿ na libro yeⁿ'é Ndyuūs:

Nguéeⁿ dichεεchí nī staava yeⁿ'é nī chí ditaáⁿ nī tan'dúúcā chí diiⁿ 'iiⁿ'yāⁿ na yáⁿ'āa cuūⁿmán naachi nguéeⁿ ch'εetinéeⁿ 'iiⁿ'yāⁿ tiempo chí ch'ó'ōo taachi n'diichineeⁿ yā 'úú chí Ndyuūs. 16 ¿Du'ú 'iiⁿ'yāⁿ chí ch'iindiveéⁿ yā nduudu yeⁿ'é Ndyuūs ní cuayiivi nduuvitaáⁿ yā? 'Túúcā diiⁿ nducyaaca 'iiⁿ'yāⁿ chí cueⁿ'é yā ndúúcu Moisés yeⁿ'e

yáⁿ'āa Egipto. Nducyaacá yā nduuvitaáⁿ yā. ¹⁷ ¿Du'ú 'iiⁿ'yāⁿ chi Ndyuūs nguée^e yiinú yā nduucú yā 'uūvī ngεεcu nduuyu? 'Túúcā nguεε yiinú yā ndúúcū 'iiⁿ'yāⁿ chi dinuuⁿndí yā ní ch'iī yā na yáⁿ'āa cuūⁿmáⁿ naachi nguée^e ch'εεtinée^e 'iiⁿ'yāⁿ. ¹⁸ ¿Du'ú 'iiⁿ'yāⁿ chi Ndyuūs ngaⁿ'á yā caavā maaⁿ chi duuchí yā chi 'iiⁿ'yāⁿ s'eeⁿ nguée^e cuuvi cundaa yā lugar naachi ntaavi'tuunúⁿ 'iiⁿ'yāⁿ yeⁿ'e yā? 'Túúcā ngaⁿ'á yā yeⁿ'e 'iiⁿ'yāⁿ chi nguée^e n'giindiveéⁿ yā nduudu yeⁿ'e yā. ¹⁹ Maaⁿ ní deenu yú ti 'iiⁿ'yāⁿ s'eeⁿ nguée^e cuuvi cundaa yā lugar yeⁿ'e Ndyuūs ti nguée^e i'téenu yā Ndyuūs.

4

¹ Maaⁿ ní Ndyuūs tee yā promesa s'uuúⁿ chi cuuvi cundaa yú lugar yeⁿ'é yā ní cuuvi ntaavi'tuunúⁿ yú ndúúcu Ndyuūs. Canée^e chí candεε yú cuidado caati 'aatī 'aama chée^e ndis'tiī nguée^e cuchée^e nī tanducuéⁿ'ē dendu'ū ní nguée^e cuuvi cundaa nī lugar miiⁿ. ² Caati 'iiⁿ'yāⁿ yeⁿ'é Jesucristo ndéé yā nduudu cuaacu yeⁿ'é Jesucristo nanááⁿ s'uuúⁿ, 'tiicá ntúūⁿ nanááⁿ 'iiⁿ'yāⁿ s'eeⁿ chi ch'iī yā na yáⁿ'āa cuuⁿmáⁿ naachi nguée^e ch'εεtinée^e 'iiⁿ'yāⁿ. Ní nguée^e dichí^lvē nduudu cuaacu yeⁿ'é Ndyuūs nguaaⁿ 'iiⁿ'yāⁿ s'eeⁿ ti taachi ch'iindiveéⁿ yā nduudu miiⁿ nguée^e s'téenu yā yeⁿ'ē. ³ Naati s'uuúⁿ chi i'teenu yú nduudu miiⁿ, s'uuúⁿ ní cuuvi ndaa yú naachi caⁿ'a Ndyuūs chi ntaavi'tuunúⁿ yú ndúúcu yā. 'Tíicā ngaⁿ'a Ndyuūs na libro yeⁿ'é yā naachi canée^e nguūⁿ:

Cáávā chi diín 'ii'yān s'eeⁿ 'uú nguée^e yiinú yeⁿe yā.
 Ní cuaacú ngaⁿ'á nduudu ndúú^cū maááⁿ chi
 duuchí. Nguée^e cuuvi ndaa yā nduucú na
 lugar yeⁿ'é naachi ntaavi'tuunuúⁿ.

Ní Ndyuūs di'cuiinú yā ntiinyuⁿ yeⁿ'é yā taachi
 din'dái yā iⁿ'yeeⁿdí'cū. ⁴Ní 'áámá cuaaⁿ yeⁿ'ē libro
 yeⁿ'é Ndyuūs naachi canée^e nguūⁿ ní ngaⁿ'a yeⁿ'ē
 ndíí chí ndéechē nguuvi chi ntaavi'tuunuúⁿ 'ii'yān:
 Ndyuūs ní ndíí chí ndéechē nguuvi ntaavi'tuunuúⁿ
 yā yeⁿ'ē tanducuéⁿ'ē ntiinyuⁿ yeⁿ'é yā. ⁵Ní
 canee táámá vmneⁿ'ēe na libro yeⁿ'e Ndyuūs
 'tíicā:

'Ii'yān s'eeⁿ nguée^e cuuvi cūndaa yā ní
 ntaavi'tuunuúⁿ yā nduucú. ⁶Maaⁿ ní véé^e
 n'duuvi 'ii'yān chi canée^e chi cundaa yā na
 lugar naachi ntaavi'tuunuúⁿ 'ii'yān. Naati
 'ii'yān chi vmnááⁿ vmnaaⁿ n'giindiveéⁿ
 yā nduudu cuaacu miiⁿ nguée^e sndaⁿ yā ti
 nguée^e s'téenu yā Ndyuūs. ⁷Taama vmnéⁿ'ēe
 Ndyuūs s'neéⁿ yā 'áámá nguuvi ní ngaⁿ'a
 yā chi nguuvi ní maaⁿnguuvi. Ní Ndyuūs
 ngaⁿ'a yā yeⁿ'ē nduudu miiⁿ cuayiivi taachí
 'āā chó'ōo chuū. 'Āā 'naaⁿ tiempo nguuvi
 chi David ngaⁿ'a sa yeⁿ'ē. Ní 'tíicā canée^e
 nguūⁿ na libro yeⁿ'é Ndyuūs yeⁿ'ē nguuvi
 miiⁿ:

Maaⁿnguuvi nduuti chi ndís'tiī 'caandiveéⁿ nī
 nduudu chi Ndyuūs ngaⁿ'á yā: Nguée^e
 dichéechí nī staava yeⁿ'é nī. ⁸Ní nduuti
 chi saⁿ'ā Josué chi saⁿ'ā ndíí tiiⁿ yeⁿ'e
 'ii'yān Israel s'eeⁿ cuuvi sa ca'a sa 'ii'yān
 Israel s'eeⁿ chí ntaavi'tuunuúⁿ yā tuu'mi ní
 Ndyuūs nguée^e canee chi caaⁿ'máⁿ yā taama

vmnéⁿ'ēe yeⁿ'ē táámá nguuvi. ⁹ Maaⁿ ní cáávā chuū véé chi ntaavi'tuunúuⁿ 'iiⁿ'yāⁿ chi yeⁿ'é Ndyuūs. ¹⁰ Ní 'iiⁿ'yāⁿ chi sndaá yā naachi Ndyuūs ntaavi'tuunúuⁿ yā 'āā ntéé idiíⁿ yā ntiiⁿ'nyuⁿ tan'dúúcā chi Ndyuūs 'āā ntéé idiíⁿ yā ntiiⁿ'nyuⁿ. ¹¹ Maaⁿ ní canéé chí di'cuútu yú chi cuuvi cūndaā yú lugar naachi ntaavi'tuunúuⁿ yú ní 'aatī tanáⁿ'ā yú diiⁿ yú chi nguéé i'téenu yú tan'dúúcā 'iiⁿ'yāⁿ s'eeⁿ chi nguéé chi'téenu yā.

¹² Ní nduudu cuaacu yeⁿ'é Ndyuūs ní canduuchi ní neené ditiínú. Ní vεε ca 'caāiⁿ yeⁿ'ē nguéé ti 'áámá machete chi 'caāiⁿ nduu 'uuvī lados. 'Tíicā nduudu cuaacu yeⁿ'é Ndyuūs. Ndaā na coo yeⁿ'e cuerpo yeⁿ'e yú naachi canee alma yeⁿ'e yú ndúúcū espíritu yeⁿ'e yú ndíí túútē yeⁿ'e yú. Ní déénu chεε chí tumicadínuuⁿ yú ndúúcū chεε chí neⁿ'e yú diiⁿ yú chí ngiicā yeⁿ'e staava yeⁿ'e yú. ¹³ Nguéé dε'ē vεε chí véé chí cuuvi cunúúⁿ n'de'ei yeⁿ'é Ndyuūs. Ndyuūs din'dái yā tanducuéⁿ'ē dendu'ū chí véé ní inaáⁿ yā nducuéⁿ'ē tan'dúúcā chí canee nanáaⁿ yā. Ní canéé chí ca'a yú cuenta yeⁿ'e vida yeⁿ'e yú taachi ndaa yú nanáaⁿ yā.

Jesús ni chiiduú ch'εεε taavi ca yeⁿ'e yú

¹⁴ Jesús chí daiyá Dendyuūs ní chiiduú ch'εεε taavi ca yeⁿ'e yú. Ní cunaⁿ'a yā va'ai chεεti nguuvi ní ndaá yā nanáaⁿ Ndyuūs. Ní cáávā chuū canee chí 'áámá canee yú ndúúcū chí i'teenu yú Ndyuūs. ¹⁵ Ní chiiduú ch'εεε taavi ca yeⁿ'e yú ya'ai 'iinú yā s'uuúⁿ taachi n'geenu yú ngii caati Jesús miíⁿ ní ch'eenú yā chii tanducuéⁿ'ē tan'dúúcā s'uuúⁿ naati nguéé dinuuⁿndí yā mar 'áámá vmnéⁿ'ēe.

16 Ní cáávā chuū cuuvi ndaa yú nanáán trono yeⁿé Ndyuūs yeⁿe yú ndúúcū confianza ti dineⁿé yā s'uuún. Ní 'íicú Ndyuūs cuuvi ya'ai 'iinú yā yeⁿe s'uuún ní cunnee yā s'uuún taachi, véé necesidades yeⁿe yú. Ní itée yā s'uuún denduⁿū chi n'daacā n'dai yeⁿé yā.

5

1 Tiempo chi chó'ōo 'iiⁿyāⁿ chi snée yā in'yeeⁿdí 'cūū ndεεvé yā ca'áámá cā'aama chiiduú ch'εεε chi canée chi díⁿ yā ntiiⁿnyuⁿ yeⁿé Ndyuūs cucáávā 'iiⁿyāⁿ s'eeⁿ. Ní ca'á yā ofrendas ní 'caaⁿnúnⁿ yā 'iiti chi candεε 'iiⁿyāⁿ s'eeⁿ ti ofrenda caavā nuuⁿndi yeⁿé yā. 2 Ní chiiduú ch'εεε ca ní dinuuⁿndí yā tan'dúúcā nducyáácá 'iiⁿyāⁿ. Ní cáávā chuū véé paciencia yeⁿé yā ndúúcū 'iiⁿyāⁿ chi tonto ní ndúúcū 'iiⁿyāⁿ chi dinuuⁿndí yā. 3 Ní chiiduú ch'εεε ca cáávā chi dinuuⁿndi yā canée chí 'caaⁿnúnⁿ yā 'iiti chi ofrenda yeⁿe maán yā cáávā nuuⁿndi yeⁿe maán yā tan'dúúcā chi díⁿ tanán'a 'iiⁿyāⁿ cáávā nuuⁿndi yeⁿé yā.

4 Ní mar 'áámá saⁿā cuuví diiⁿ sa nombrar maaⁿ sa lado yeⁿe chiiduú ch'εεε ca cáávā chi maán sa neⁿe sa ti Ndyuūs yaa'ví yā saⁿā chi cuuvi chiiduú ch'εεε ca chi diiⁿ sa ntiiⁿnyuⁿ yeⁿé yā tan'dúúcā chi yaa'ví yā saⁿā Aarón chi cuuvi chiiduú ch'εεε ca tiempo chi 'āā chó'ōo. 5 'Tiicá ntúūⁿ chó'ōo yeⁿe Cristo. Cristo miiⁿ nguée díⁿ yā nombrar maán yā chi cuuvi chiiduú ch'εεε ca. Ndyuūs yaa'ví yā Cristo chi cuuvi chiiduú ch'εεε ca. Ní 'tíicā canée nguūⁿ na libro yeⁿé Ndyuūs:

Dii ní daiyá, 'úú ní chiida di ní cuaacu chí dii ní daiyá. ⁶ Ngaⁿ'a ntúūⁿ táámá ni canéé nguūⁿ na libro yeⁿ'é Ndyuūs 'tíicā:

Díí ní daiyá ní cuéⁿ'é daāⁿmaⁿ canee di chi-iduú ch'εεε ca. Tan'dúúccā chi tiempo chi 'āā chó'ōo chiiduú ch'εεε ca chi nguuvi Melquisedec 'tiicá nī ti yeⁿ'ē ndaata yeⁿ'é yā. ⁷ Ní taachi Jesús canee yā iⁿ'yeeⁿdí 'cūū caⁿ'angua'á yā nanááⁿ Ndyuūs chiidá yā ní ngaⁿ'a yā: N'dií Ndyuūs diíⁿ nī chiiⁿ chi neⁿ'é nī. Ní 'caī diitú yā neⁿ'e chi chεεcú yā: N'diī, Ndyuūs, cuuvi nadanguáⁿ'ai nī 'úú chi nguéé 'cuūví nduuti chi neⁿ'é nī diíⁿ nī 'tíicā. Ní Ndyuūs ch'iindiveéⁿ yā nduudu yeⁿ'e Jesús taachi ngaⁿ'angua'á yā ti dich'εεté yā Ndyuūs. Ní Ndyuūs ca'á yā fuerzas Jesús. ⁸ Ní 'áará chí Jesús miiⁿ ní daiyá Dendyuūs ch'eeⁿ yā cáávā dendú'ū chi canéé chí ch'eenú yā chií ní ch'iindiveéⁿ yā yeⁿ'e nducuéⁿ'ē. ⁹ Ní taachi Ndyuūs n'diichineéⁿ yā Jesús, Jesús miiⁿ ní diíⁿ yā nducuéⁿ'ē chi neⁿ'e Ndyuūs. Ní 'íicú Jesús miiⁿ cuuví yā nadanguáⁿ'ai yā nducyaaca s'uuúⁿ chi n'giindiveeⁿ yú yeⁿ'e yā. ¹⁰ Ní Ndyuūs diíⁿ yā chí Jesús cuuvi chiiduú ch'εεε ca tan'dúúccā tiempo chí chó'ōo chi-iduú ch'εεε ca chí nguuví Melquisedec, 'tiicá yā.

Véé peligro yeⁿ'e yú chí ngaⁿ'a yú chí 'āā ntéé i'teenyú Jesucristo

¹¹ Maaⁿ ní véé cá chí neⁿ'é 'nū caaⁿ'máⁿ 'nū yeⁿ'e Melquisedec chí chiiduú ch'εεε ca naati ngii n'dái

caan'mán 'nū yeⁿē ti ndís'tiī ní nguéé ituumicadi-
 inuuⁿ nī. ¹² 'Āā chó'ōo tiempo chi ndís'tiī 'āā s'téenu
 nī ní maaⁿ ní ndís'tiī canéé chí ca'cueéⁿ nī 'iiⁿ'yāⁿ
 naati ndíí maaⁿ 'āā neⁿé nī taama vmnéⁿ'ēe chí
 'áámá 'iiⁿ'yāⁿ ca'cueéⁿ yā ndís'tiī dendu'ū chí vm-
 nááⁿ vmnaaⁿ yeⁿé Ndyuūs. Ní ndís'tiī ní 'āā débil
 nī. Ní tan'dúúcā dacuá'āa chí neⁿe leche ní nguéé
 neⁿe comida chí ditiīnú, 'tiicá nī. ¹³ Ní 'iiⁿ'yāⁿ chí
 dámaāⁿ ngi'i leche ní tan'dúúcā dacuá'āa 'tiicá yā.
 Ní nguéé deenú yā de'ē chí n'daacā o de'ē chí nguéé
 n'daacā. ¹⁴ Ní comida chí ditiīnu ní che'é 'iiⁿ'yāⁿ
 n'gēēté chí 'āā deenú yā in'nuú yā chéé chí n'daacā o
 chéé chí nguéé n'daacā caati 'tíicā costumbre yeⁿé
 yā chí diíⁿ yā.

6

¹ Maaⁿ ní i'téenu ca yú ní 'caandiveeⁿ ca yú cosas
 chí chεεchi chí 'iiⁿ'yāⁿ ca'cueéⁿ yā s'uuúⁿ. Ní nguéé
 neⁿe yú 'caandiveeⁿ yú taama vmnéⁿ'ēe tan'dúúcā
 chí ngi'cueéⁿ yā s'uuúⁿ ndii vmnááⁿ vmnaaⁿ taachi
 cáámá i'teenu yú nduudu cuaacu yeⁿé Cristo. Ní
 nguéé nga'a yú táámá vmnéⁿ'ēe chí s'neeⁿ yú
 ntiiⁿnyuⁿ yeⁿe yú chí nguéé n'daacā chí diiⁿ chí
 'cuūvi yú ti maaⁿ ní i'teenu yú Jesucristo. ² Ní nguéé
 ca'cueeⁿ ca yú yeⁿē chí ngεεdínuūⁿní, ní nguéé yeⁿē
 chí s'nuuⁿ yú ta'a yú nanááⁿ tiíⁿ 'iiⁿ'yāⁿ, ní nguéé
 yeⁿē chí nnduuchí 'iiⁿ'yāⁿ chí yeⁿe Cristo yeⁿē
 nguaaⁿ tináⁿ'ā, ní nguéé yeⁿē nguuvi chí Cristo diíⁿ
 yā juzgar nducyaaca 'iiⁿ'yāⁿ. ³ Ca'cueeⁿ ca yú más
 cā yeⁿe chí i'téenu yú yeⁿe Cristo. Ní chuū ní diiⁿ
 yú nduuti chí Ndyuūs neⁿe yā.

⁴ Ní ¿de'ē yeⁿe 'iiⁿ'yāⁿ chí 'āā sta'á yā deεve chí
 Cristo, ní sta'á yā cosas chí n'dai taavi chí Cristo

ca'a yā, ní 'āā sta'á yā Espíritu N'dai yeⁿ'e Cristo,
⁵ ní deēnú yā nduudu cuaacu chí n'dai chí yeⁿ'é
 Ndyuūs ndúúcū poder chi yeⁿ'e táámá iⁿ'yeeⁿdi chi
 cuchii? ⁶ Ní nduuti chi 'iiⁿ'yāⁿ s'eeⁿ ndaacadaamí
 yā yeⁿ'e Cristo ní dinuuⁿndí yā, nguéé cuuvi díⁿ yā
 ndaa yā nanááⁿ Cristo chi nadach'εεcú yā nuuⁿndi
 yeⁿ'é yā, tí 'iiⁿ'yāⁿ s'eeⁿ díⁿ yā tan'dúúcā chi
 s'nééⁿnga'á yā daiyá Ndyuūs miiⁿ taama vmnéⁿ'ēe.
 Ní díⁿ yā chi Cristo miiⁿ 'cuináaⁿ yā nguaaⁿ 'yááⁿ
 n'dái 'iiⁿ'yāⁿ. ⁷ Ndyuūs díⁿ yā ndúúcū 'iiⁿ'yāⁿ
 s'eeⁿ tan'dúúcā chi díⁿ yā ndúúcū yáⁿ'āa taachi
 n'dee cuuví ngeeⁿ cuūvi vmnááⁿ yáⁿ'āa ni yáⁿ'āa
 sta'ā nuūⁿnīⁿ miiⁿ 'áámá 'áámá vmnéⁿ'ēe chi ngeeⁿ
 cúúvī. Ndyuūs ca'á yā yáⁿ'āa miiⁿ cosecha chi
 n'dai 'iiⁿ'yāⁿ chí ngiīnú yā ndaataá. ⁸ Naati nduuti
 chí yáⁿ'āa miiⁿ ní ngii yááⁿ yeⁿ'ē ndúúcū yaata
 chí nguéé dichíí'vē tuu'mi ní nguéé dichíí'vē. Ní
 Ndyuūs nguéé ca'á yā cosecha n'dai yeⁿ'ē níicú
 cuayivi 'iiⁿ'yāⁿ ní 'neeⁿ yáⁿ'a yā yáⁿ'āa miiⁿ.

*Véé chi cuuvi yeⁿ'e yú chi nnee s'uuúⁿ chi 'áámá
 cunee yú*

⁹ Maaⁿ ní 'áará chi ngaⁿ'á 'nū 'tíicā yeⁿ'e ndís'tiī,
 hermanos, deenu 'nū chi véé cosas chí n'dai taavi
 ca yeⁿ'é nī ti yeⁿ'é Cristo ndís'tiī ní Ndyuūs nadan-
 guáⁿ'ai yā ndís'tiī. ¹⁰ Ndyuūs dámaāⁿ díⁿ yā
 dendu'ū chí cuaacu. Nn'gaacú yā yeⁿ'ē ntiīnyuⁿ
 chí díⁿ nī ní táácā nneé nī hermanos yeⁿ'ē yú caati
 dineⁿ'é nī hermanos chí i'téenu yā Jesucristo. Ní
 'tíicā ní díⁿ nī nguuvi nguuvi. ¹¹ Maaⁿ ní neⁿ'é 'nū
 chí ca'áámá ca'áámá ndís'tiī daamá nūⁿ idiⁿ ní
 ndúúcū núúⁿmáⁿ staava yeⁿ'é nī tan'dúúcā chí díⁿ
 nī taachi cáámá i'téenu nī. Ní díⁿ nī ndíi tiempo

chi ch'iī nī. Ní 'tíicā cuuvi cuaacu chi véé chi cuuvi ye^{n'é} nī. ¹² Nguéé ne^{n'é} 'nū chi nduuví 'daan'di nī naati ne^{n'é} 'nū chi din'daacá nī tan'dúucā taná'a cā 'ii^{n'yā} chi i'téenu yā. Ní cunee ngiinú yā ye^{n'e} vaadī n'dai chí Ndyuūs ca'á yā 'ii^{n'yā} s'eeⁿ chi Ndyuūs nga^{n'á} yā chi cuuvi ye^{n'é} yā 'ii^{n'yā} s'eeⁿ.

¹³ 'Āā 'naán tiempo chi chó'oo Ndyuūs diíⁿ yā 'áámá compromiso ndúucū Abraham ní Ndyuūs nga^{n'á} yā cáávā chi duuchi maán yā chi 'tíicā ca^{n'á} yā diíⁿ yā caati nguéé cá táámá 'ii^{n'yā} chi ch'εετε cá yā ti Ndyuūs. ¹⁴ Ní ca^{n'a} yā: Díí, Abraham, cuaacu ní^{n'yú} di'viicú dii ní diíⁿ chi cuuvi n'dee n'dái daiyá 'ii^{n'yā} ye^{n'e} di cuaaⁿ naachi cuchī. ¹⁵ Abraham cūnee ngiinú yā compromiso ye^{n'é} Ndyuūs ndúucū vaadī ngiinū ní tunée yā compromiso chi Ndyuūs ca^{n'a} yā chi ca'á yā Abraham miiⁿ. ¹⁶ Maaⁿ ní taachi 'ii^{n'yā} ye^{n'e} i^{n'yee}dí 'cūū nga^{n'á} yā chi cuaacu ní^{n'yú} ca^{n'á} yā diíⁿ yā, nga^{n'á} yā “Por Dios” cucáávā 'áámá yā chi ch'εετε cá yā nguéé ti 'ii^{n'yā} s'eeⁿ. Níicú taachi 'ii^{n'yā} s'eeⁿ nga^{n'á} yā chi 'tíicā ca^{n'á} yā diíⁿ yā cáávā 'ii^{n'yā} miiⁿ chí ch'εετε ca tuu'mi ní nguéé véé más cā chi cuuvi caa^{n'mán} yā ye^{n'e}. ¹⁷ Ní 'tíicā Ndyuūs ne^{n'é} yā ch'i^{n'í} yā 'ii^{n'yā} s'eeⁿ ye^{n'e} Abraham chi cuaacu ní^{n'yú} diíⁿ yā cumplir compromiso ye^{n'é} yā. Ní nguéé ñ'daaⁿ mar 'áámá nduudu ye^{n'é} yā. Ní cáávā chuū nga^{n'á} yā cucáávā chi duuchi maán yā. ¹⁸ Ní cáávā chuū véé 'úúví dendu'ū chi nguéé cuuvi ñ'daaⁿ. Ndyuūs ní nguéé cuuvi cu^{n'ee}n yā táámá cosa lugar ye^{n'e} 'uuví compromiso ye^{n'é} Ndyuūs ndúucū chi nga^{n'á} yā chi ca^{n'á} yā diíⁿ yā cáávā chi duuchi maán yā. Ndyuūs nguéé cuuvi caa^{n'mán} yā nduudu yaadi. Ní ndúucū compromiso ye^{n'é} yā, Ndyuūs

tee yā s'uuúⁿ 'viich'εεtínūⁿ ch'εετε yeⁿ'e yú caati s'uuúⁿ n'nuuⁿ yú Ndyuūs ní i'téenu yú 'yā ní yeⁿ'ē chi Ndyuūs tée yā chi cuuvi yeⁿ'ē yú. ¹⁹ Chíⁿ chí i'téenu yú cáávā alma yeⁿ'e yú ní tan'dúúcā 'áámá ancla yeⁿ'e barco ti i'nēēⁿ diíⁿ barco chi 'āā ntéé ínuⁿ'u. 'Tíicā s'uuúⁿ ndúúcū chí i'téenu yú cuuvi ndáá niiⁿnuⁿ yú nanááⁿ Ndyuūs. ²⁰ Jesucristo 'āā ndaá yā nanááⁿ Ndyuūs vmnááⁿ vmnaaⁿ yeⁿ'ē s'uuúⁿ. Ní maaⁿ ní cááva yā cuuvi ndaa yú nanááⁿ Ndyuūs. Ní maaⁿ ní Jesucristo miiⁿ ní chiiduú ch'εετε ca yeⁿ'e yú chi 'áámá cūnee ná ntiiⁿnyuⁿ miiⁿ. Ní tan'dúúcā chiiduú ch'εετε ca Melquisedec chi 'áámá cūnee na ntiiⁿnyuⁿ 'āā tiicá nūⁿ Jesucristo.

7

Yeⁿ'e Jesús chi chiiduú ch'εετε ca tan'dúúcā Melquisedec chi chiiduú ch'εετε ca

¹ 'Iiⁿ'yāⁿ Melquisedec ni rey yeⁿ'é yāāⁿ Salem ní chiiduú ch'εετε ca yeⁿ'e Ndyuūs chí ch'εετε n'dai. Tiempo chi 'āā 'nááⁿ chó'ōo, saⁿ'ā Abraham ní taachi cuchíi sa chi cheⁿ'e sa ná caandaá naachi ch'iiⁿ'nuⁿ sa reyes, saⁿ'ā Abraham miiⁿ ndaaca sa nanááⁿ chiiduú ch'εετε ca Melquisedec ní Melquisedec di'viicú yā Abraham. ² Ní Abraham miiⁿ ní ca'ā sa Melquisedec 'áámá ndiichí parte yeⁿ'ē nducuén'ē chí divíi yā yeⁿ'e 'iiⁿ'yāⁿ yeⁿ'e reyes cucáávā caāndāa. Ní chí duuchi chí Melquisedec vmnááⁿ vmnaaⁿ neⁿ'ē caaⁿ'máⁿ rey chí yeⁿ'e vaadī cuaacu. Ní cuayiivi ní neⁿ'e caaⁿ'máⁿ rey yeⁿ'e yāāⁿ Salem, ní chí duuchí yā neⁿ'e caāⁿ'maⁿ rey yeⁿ'ē vaadī 'diíiⁿ. ³ Nguéé canee

nguūⁿ ch'εε chi ch'εεcú Melquisedec, ch'εē chi chi-
idá yā ndíí nguéé ndúú ye^{n'e} 'iiⁿ'yāⁿ ye^{n'é} yā ye^{n'e}
chi chiicá yā. Nguéé canee nguūⁿ ye^{n'e} tiempo
chi ch'iindiyáaⁿ yā ndíí nguéé ndúú ye^{n'e} tiempo
chi ch'íi yā. Ní cucáávā chuū Melquisedec miiⁿ
tan'dúúcā daiyá Ndyuūs 'tiicá yā ti 'áámá chiiduú
ch'εεε ca chi 'áámá cūneeⁿ na ntiiⁿnyuⁿ cuae^{n'e}
daāⁿmaⁿ.

⁴ Maaⁿ ní nadacádíínuuⁿ nī chi ch'εεε n'dai sa^{n'a}
Abraham 'cūū. Abraham ca'a yā 'áámá ndiichi
parte ye^{n'e} nducué^{n'e} chi divíi yā ye^{n'e} reyes taachi
cu^{n'u} yā na caāndaá. ⁵ 'Tíicā nga^{n'a} ley ye^{n'e}
Ndyuūs chi Moisés dingúuⁿ yā: Nducyaaca chi-
iduú chi ye^{n'e} ndaata ye^{n'e} 'iiⁿ'yāⁿ Leví canéé chi
cuta'á yā ndííchí parte ye^{n'e} nducué^{n'e} chi véé
ye^{n'e} nducyáácá 'iiⁿ'yāⁿ chí ye^{n'e} Abraham ní ye^{n'e}
'iiⁿ'yāⁿ ye^{n'e} ndaata ye^{n'é} yā, ti 'iiⁿ'yāⁿ Leví miiⁿ
ní ye^{n'e} ndaata Abraham. ⁶ Naati chiiduú ch'εεε
ca Melquisedec miiⁿ ní nguéé ye^{n'e} 'iiⁿ'yāⁿ Leví
naati sta'á yā ndííchí parte ye^{n'e} Abraham. Ní
Abraham miiⁿ ní sa^{n'a} chi Ndyuūs diíⁿ yā compro-
miso ndúúcū sa chi véé chi cuuví ye^{n'e} sa. Ní chi-
iduú ch'εεε ca Melquisedec di'viicú yā Abraham.
⁷ Maaⁿ ní Melquisedec chí di'viicú yā Abraham
ní ch'εεε cá yā nguéé ti Abraham chí di'viicú yā
'yā. ⁸ Maaⁿ ní 'iiⁿ'yāⁿ Leví chi ita'á yā chi ndiichi
parte ye^{n'e} nducué^{n'e} chi véε ye^{n'e} yú, ní 'iiⁿ'yāⁿ chi
ca^{n'a} yā 'cuūvi yā. Naati canéé nguūⁿ na libro ye^{n'é}
Dendyuūs 'tíicā chi chiiduú ch'εεε ca Melquisedec
chí sta'á yā ndiichi parte ye^{n'é} 'iiⁿ'yāⁿ ní nguéé
nga^{n'a} chi n'díi yā. ⁹ Ní chuū ní ne^{n'e} caa^{n'}māⁿ
chi taachi Abraham ca'á yā ndiichi parte ye^{n'é}
yā chiiduú ch'εεε ca Melquisedec, maaⁿ tiempo

nūuⁿ 'iiⁿyāⁿ yeⁿ'e Leví chi yeⁿ'ē ndaata Abraham ní 'iiⁿyāⁿ chí sta'á yā ntúūⁿ chí ndiichi parte yeⁿ'é yā. 'Tiicá ntúūⁿ ca'a yā chí ndiichi parte yeⁿ'é yā chiiduú ch'εετε ca Melquisedec. ¹⁰ Ní 'áará chí saⁿ'ā Leví miiⁿ 'āā cuéé 'cuundiyaāⁿ sa, Abraham miiⁿ diíⁿ yā chuū cáávā 'iiⁿyāⁿ yeⁿ'é yā chí 'āā cuéé 'cuundiyaāⁿ yā taachi ndaācā sa chiiduú ch'εετε ca Melquisedec cuaaⁿ na yúúní, ní ca'á yā chí ndiichi parte miiⁿ.

¹¹ Maaⁿ ní 'iiⁿyāⁿ s'eeⁿ yeⁿ'e ndaata Israel sta'á yā ley yeⁿ'é yā yeⁿ'ē chiiduú s'eeⁿ chí yeⁿ'ē ndaata Leví. Ní 'iiⁿyāⁿ Leví s'eeⁿ ní yeⁿ'e ndaata Aarón. Ní nduuti chí 'iiⁿyāⁿ Leví s'eeⁿ cuuvi diíⁿ yā chí nducyaaca 'iiⁿyāⁿ cuuvi 'cuεεtinéé n'daacá yā ní nguéé nuuⁿndi yeⁿ'é yā, ¿de'ē cáávā chí neⁿ'é yā táámá chiiduú ch'εετε ca chí 'āā ví'í cá ní nguéé yeⁿ'ē ndaata chiiduú Aaron? Naati tan'dúúcā chiiduú ch'εετε ca Melquisedec, 'tiicá yā. ¹² Caati naachi n̄'daaⁿ yā chiiduú ch'εετε ca yeⁿ'ē táámá ndaata yeⁿ'e 'iiⁿyāⁿ Israel 'tiicá ntúūⁿ canee chí n̄'daa yā ley. ¹³ Ná libro yeⁿ'é Ndyuūs 'tíicā canéé nguūⁿ yeⁿ'e Señor yeⁿ'e yú. Señor ní yeⁿ'ē táámá 'iiⁿyāⁿ chí nguéé diíⁿ yā ntiiⁿnyuⁿ yeⁿ'e chiiduú chí diiⁿ ntiiⁿnyuⁿ yeⁿ'ē nátai naachi 'caaⁿ'núⁿ yā 'iiti cáávā yeⁿ'e ofrenda yeⁿ'e Ndyuūs. ¹⁴ Nducyaaca 'iiⁿyāⁿ ní déénu yā chí Señor Jesucristo yeⁿ'ē yú ch'iindiyáaⁿ yā yeⁿ'ē 'iiⁿyāⁿ yeⁿ'e Judá. Ní Moisés nguéé ngaⁿ'a yā de'ē vεε yeⁿ'e 'iiⁿyāⁿ yeⁿ'e Judá taachi cāⁿ'a yā yeⁿ'e chiiduú yeⁿ'e ndaata yeⁿ'é yā.

¹⁵ Ní neené cuaacu ca canee taachi ndaā táámá chiiduú chí tan'dúúcā chiiduú ch'εετε ca Melquisedec, 'tíica yā. ¹⁶ Ní táámá chiiduú miiⁿ nguéé diíⁿ yā ntiiⁿnyuⁿ yeⁿ'ē chiiduú cáávā ley

chi ngaⁿa chi chiiduú miiⁿ canee chi cuuvi yeⁿe 'iiⁿyāⁿ yeⁿe ndaata yeⁿe chiiduú. Naati táámá chiiduú miiⁿ diíⁿ yā ntiiⁿnyuⁿ yeⁿe chiiduú cáávā chi véé vida cueⁿe daāⁿmaⁿ yeⁿ'é yā ní véé poder yeⁿ'é yā. ¹⁷ 'Tíicā canee nguūⁿ na libro yeⁿ'é Ndyuūs naachi Ndyuūs ngaⁿ'á yā yeⁿe yā 'tíicā:

Díí ní 'áámá chiiduú chi cuéⁿ'é daāⁿmaⁿ 'áámá cūnee na ntiiⁿnyuⁿ. Tan'dúúⁿcā chiiduú ch'εεε ca Melquisedec 'tiicá nī. ¹⁸ Maaⁿ ní ley yeⁿe Moisés ní nguéé ley yeⁿ'é maaⁿ caati nguéé dichíí'vē. ¹⁹ Ley yeⁿe Moisés nguéé cuuvi diiⁿ chi 'iiⁿyāⁿ 'cuεεtinéé n'daaca yā chi nguéé nuuⁿndi yeⁿ'é yā. Naati maaⁿ ná lugar yeⁿ'é ley miiⁿ véé 'viich'εεtínūⁿ chi n'daacā ca chí cuuvi yeⁿ'é yú chi Ndyuūs tee yā s'uuúⁿ. Ní cáávā chuū ndaa yú nanááⁿ Ndyuūs.

²⁰ Ní Ndyuūs, cáávā chi duuchi maáⁿ yā, caⁿ'a yā chi diíⁿ yā chi Jesucristo chiiduú ch'εεε ca. Tanáⁿ'ā ca chiiduú diíⁿ yā ntiiⁿnyuⁿ tan'dúúⁿcā chi ngaⁿ'a reglas yeⁿe 'iiⁿyāⁿ nguéé cáávā mar 'áámá nombre yeⁿ'é Ndyuūs. Naati yeⁿ'é táámá chiiduú ch'εεε ca chí Jesucristo, Ndyuūs ngaⁿ'á yā yeⁿe Jesucristo ndúúⁿcū chi duuchi maáⁿ yā chí canéé yā 'áámá chiiduú ch'εεε ca. ²¹ 'Tíicā canéé nguūⁿ na libro yeⁿ'é Ndyuūs naachi Ndyuūs ngaⁿ'a yā yeⁿ'é taama yā:

Señor Ndyuūs ngaⁿ'á yā ndúúⁿcū chí duuchi maáⁿ yā ní nguéé n'dáaⁿ yā chí ngaⁿ'a yā. Díí ní cuéⁿ'é daāⁿmaⁿ canéé dí chí dii ní 'áámá chiiduú dii tan'dúúⁿcā chiiduú ch'εεε ca Melquisedec 'tíicā di. ²² Maaⁿ ní cucáávā chí Ndyuūs diíⁿ yā chuū, Jesús ní diíⁿ yā chí

seguro canee compromiso ye^{n'}é Ndyuūs. Ní n'daacā ca nguéeé tí chi vmnááⁿ vmnaaⁿ chi ye^{n'}é 'ii^{n'}yāⁿ s'eeⁿ. 23 'Tiicá dendú'ū neené 'yaaⁿ chiiduú vεε naati nguéeé ch'εεtinée yā ndúúcū ntiiⁿnyuⁿ caati ch'iī yā. 24 Naati Jesucristo miiⁿ nguéeé ch'iī yā ti 'áámá canee yā. Ní nguéeé ca'a yā táámá 'ii^{n'}yāⁿ ntiiⁿnyuⁿ chi ye^{n'}é yā. 25 Maaⁿ ní Jesucristo cuuvi nadanguá^{n'}ai yā cue^{n'}e daāⁿmaⁿ nducyáácá 'ii^{n'}yāⁿ chi ndaa yā nanááⁿ Ndyuūs cáávā Jesucristo miiⁿ. Níicú Jesucristo miiⁿ canduuchi yā cue^{n'}e daāⁿmaⁿ ní nga^{n'}angua'á yā cáávā 'ii^{n'}yāⁿ s'eeⁿ chi ye^{n'}é yā.

26 'Tíicā Jesús miiⁿ ní chiiduú ch'εετε ca chi itée yā necesidades ye^{n'}e yú. Ní dεενε yā. Ní nguéeé diíⁿ yā cosas chi nguéeé n'daacā. Ní nguéeé diíⁿ yā mar 'áámá nuuⁿndi. Jesucristo miiⁿ 'āā vi'í ca yā ye^{n'}e 'ii^{n'}yāⁿ chi dinuuⁿndí yā. Ní cue^{n'}é yā yaācu cá nguéeé tí nanguuvi. 27 Ní Jesucristo chi chiiduú ch'εετε ca nguéeé canée chí diíⁿ yā tan'dúúcā taná^{n'}ā chiiduú n'gεετε ca chi 'caa^{n'}núⁿ yā 'iiti nguuvi nguuvi cáávā nuuⁿndi ye^{n'}e maáⁿ yā ní cuayiivi cáávā nuuⁿndi ye^{n'}e taná^{n'}ā ca 'ii^{n'}yāⁿ. Jesús miiⁿ 'áámá vmné^{n'}ēe diíⁿ yā chuū taachi nca'a vida ye^{n'}e maáⁿ yā taachi ch'iī yā cáávā nuuⁿndi ye^{n'}e yú. 28 Cáávā ley ye^{n'}e Moisés 'ii^{n'}yāⁿ i'néeⁿ yā chiiduú n'gεετε ca chi 'ii^{n'}yāⁿ chi véeé nuuⁿndi ye^{n'}é yā. Chó'oo 'naaⁿ tiempo ní cuayiivi ní Ndyuūs nga^{n'}á yā cáávā chi duuchi maáⁿ yā chi daiyá yā ní chiiduú ch'εετε ca chi diíⁿ yā chiiⁿ chi Ndyuūs ne^{n'}é yā chí diíⁿ yā. Ní 'áámá cūnee yā cue^{n'}e daāⁿmaⁿ.

8

Jesucristo ní abogado yeⁿ'ē táámá compromiso

¹ Chuū chi caⁿ'a 'nū ní ch'εετε ca yeⁿ'e tanducuéⁿ'ē chi ngaⁿ'á 'nū chi 'tíicā. Chiiduú ch'εετε ca yeⁿ'e yú chi Jesucristo ní véé yā ná va'ai chεεti nguuvi na lado yeⁿ'ē honor yeⁿ'e trono yeⁿ'é Ndyuūs chí canéé na va'ai chεεti nguuvi. ² Ní Jesucristo diíⁿ yā ntiiⁿnyuⁿ yeⁿ'ē chiiduú ch'εετε ca na yaācū na va'ai ch'εετε nguuvi chi cuaacu níⁿnyúⁿ chí yeⁿ'é Ndyuūs. Ní 'iiⁿ'yāⁿ s'eeⁿ nguéé din'dái yā yaācū miiⁿ ti Señor Jesucristo maáⁿ yā din'dái yā. ³ 'Iiⁿ'yāⁿ s'neéⁿ yā ca'áámá cā'aama chiiduú ch'εετε ca chí canéé chí ca'á yā ofrenda ní 'caaⁿ'núⁿ yā 'iiti cáávā nuuⁿndi yeⁿ'é 'iiⁿ'yāⁿ. Cáávā chuū Jesucristo canéé chí véé yeⁿ'é yā chí cuuvi ca'a yā chí vida yeⁿ'e maáⁿ yā. ⁴ Ní ndúútí chí Cristo miiⁿ cunée yā iⁿ'yeeⁿdí 'cūū nguéé cuuvi chiidúú yā caati véé chiiduú s'eeⁿ chí nga'a yā ofrendas nanááⁿ Ndyuūs tan'dúúcā chí ngaⁿ'a ley yeⁿ'e Moisés. ⁵ Ní chiiduú s'eeⁿ ní diíⁿ yā ntiiⁿnyuⁿ yeⁿ'é yā ní diíⁿ yā tan'dúúcā ntiiⁿnyuⁿ yeⁿ'e yaācū chí canéé na va'ai ch'εεti nguuvi. Deenú 'nū chí diíⁿ yā copiar ntiiⁿnyuⁿ yeⁿ'é Ndyuūs ti taachi Moisés neⁿ'é yā din'dái yā yaācū chí va'ai tíinūⁿ, Ndyuūs caⁿ'a yā chí yā Moisés ní ngaⁿ'a yā:

Dii, Moisés, candéε nī cuidado yeⁿ'ē tanducuéⁿ'ē chí diiⁿ di. Ní diiⁿ di tan'dúúcā chí ch'iⁿ'í dii taachi canee di na cuééti. ⁶ Naati Cristo chí chiiduú ch'εετε ca yeⁿ'e yú diíⁿ yā ntiiⁿnyuⁿ chí ch'εετε taavi ca nguéé ti yeⁿ'e chiiduú n'gεετε ca yeⁿ'ē iⁿ'yeeⁿdí 'cūū caati Ndyuūs diíⁿ yā compromiso chí Cristo canéé yā naavtaⁿ'ā yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū

ndúúcū Ndyuūs. Maaⁿ ní s'uuúⁿ cuuvi ndaa yú nanááⁿ Ndyuūs cáávā Cristo miiⁿ. Ní compromiso miiⁿ ní ch'εεε ca tí yeⁿ'e tandu-cuéⁿ'ē chi n'daacā taavi ca.

⁷ Ní nduuti chí compromiso chi vmnááⁿ vmnaaⁿ chi yeⁿ'é Ndyuūs ní n'daacā taavi ca tuu'mi ní nguéé canee chi dííⁿ yā ndiichí ndii 'úúví compromiso. ⁸ Naati Ndyuūs n'diichi yā chi nguéé n'daacā dííⁿ 'iiⁿ'yāⁿ tiempo chi 'āā chó'ōo. Ní ngaⁿ'á yā ngīi yā 'iiⁿ'yāⁿ s'eeⁿ tan'dúúcā chi canéé nguūⁿ na libro yeⁿ'é yā 'tíicā:

'Tíicā ngaⁿ'a Señor: Tiempo chi cuchii 'úú ní dííⁿ 'áámá compromiso ngaī ndúúcū 'iiⁿ'yāⁿ yeⁿ'e ndaata Israel ní ndúúcū 'iiⁿ'yāⁿ yeⁿ'e ndaata Judá.

⁹ Nguεε idiíⁿ tan'dúúcā chi dííⁿ ndúúcū chiidá yā taachi divíi 'iiⁿ'yāⁿ yeⁿ'e yáⁿ'āa Egipto. 'Iiⁿ'yāⁿ s'uuⁿ nguéé dííⁿ yā tan'dúúcā chí 'úú yaa'ví 'iiⁿ'yāⁿ s'uuⁿ. Ní cáávā chuū nguéé dííⁿ cuenta yeⁿ'é yā.

¹⁰ Cuayiiivi chí chó'ōo nguuvi s'eeⁿ ní maaⁿ ní chuū chí compromiso ngaī chí caⁿ'á dííⁿ ndúúcū 'iiⁿ'yāⁿ yeⁿ'e nación Israel. Ngaⁿ'a Señor: Cu'neéⁿ leyes yeⁿ'é na vaanicadiínūuⁿ yeⁿ'é yā ní dinguúⁿ leyes yeⁿ'é na staava yeⁿ'é yā. Ní 'úú cuuvi Ndyuūs yeⁿ'é yā, ní 'iiⁿ'yāⁿ s'eeⁿ cuuvi 'iiⁿ'yāⁿ yeⁿ'é.

¹¹ Ní mar 'áámá yā canee chí ca'cueéⁿ yā 'iiⁿ'yāⁿ yeⁿ'e nación yeⁿ'é yā 'tíicā. Ndís'tiī n'diichí ní Señor miiⁿ, caati nducyáácá yā ní n'diichí yā 'úú ndíi 'iiⁿ'yāⁿ chí ngaⁿ'ā ntiiⁿ'nyúⁿ yā ndii taná'a 'iiⁿ'yāⁿ.

12 Ní 'úú ní nadach'εεcú nuuⁿndi chi diín yā ní 'āā ntéé nn'gaacú nuuⁿndi yeⁿ'é yā. 13 Ní Ndyuūs ngaⁿ'a yā yeⁿ'ē compromiso chi ngai ti caati compromiso chi vmnááⁿ vmnaaⁿ ní 'āā ndiicū tuu'mi ní deenu yú chi dendú'ū chi 'āā ndiicū ní 'āā nuúⁿ 'cuiinu.

9

Yeⁿ'e yáacū na iⁿ'yeeⁿdí 'cūū ní yeⁿ'ē yáacū na va'ai chεeti nguuvi

1 Cuáacú chi véé reglas yeⁿ'e compromiso chi vmnááⁿ vmnaaⁿ ndúúcū yaācū chi 'iiⁿyāⁿ s'eeⁿ din'dái yā naachi dich'εεεε yā Ndyuūs. 2 Din'dái yā yaācū yeⁿ'e tíínūⁿ ndúúcū 'uuvī cuartos. Cuarto chi vmnááⁿ vmnaaⁿ ní nguuvi Lugar Dεεεε. Ní chεeti cuarto miiⁿ véé 'áámá candelero ndúúcū 'áámá mesa, ní vmnaaⁿ mesa véé pan chi ofrenda yeⁿ'é Ndyuūs. 3 Ná cuarto chi yaānūⁿ táámá lado yeⁿ'e cortina yeⁿ'e tíínūⁿ nguuvi Lugar Dεεεε N'dai Ca Yeⁿ'é Ndyuūs. 4 Na cuarto miiⁿ véé 'áámá nátaī yeⁿ'e 'diiⁿnguāaⁿ naachi chiiduú ch'εεεε ca ngíⁿ'í yā cúⁿ'úyaa. Ní míⁿ canéé 'áámá caja chi yeⁿ'ē compromiso. Nducuéⁿ'ē lados yeⁿ'e caja miiⁿ ní candúūu 'diiⁿnguāaⁿ vmnááⁿ yeⁿ'ē. Chεeti caja miiⁿ véé chííté yeⁿ'ē 'diiⁿnguāaⁿ ní miiⁿ snúūⁿ pan chi nguuvi maná. Ní chεeti caja ntúūⁿ canéé nducú chi nanguaaⁿnu chi yeⁿ'e Aarón ndúúcū 'úúví tablas yeⁿ'é tuū naachi canéé nguūⁿ ley chi diín Ndyuūs. 5 Vmnaaⁿ caja miiⁿ canéé 'uūvī querubines tan'dúúcā ángeles ndúúcū ngεεchí yā. Ní miiⁿ Ndyuūs canéé yā. Ní canéé 'cutií yeⁿ'e ngεεchí yā yeⁿ'ē vmnaaⁿ cuaaⁿ naachi Ndyuūs nadich'εεcú yā nuuⁿndi yeⁿ'ē nducyaaca 'iiⁿyāⁿ. Maaⁿ ní

ye^{n'}é chuū nguéé cuuvi caa^{n'}maⁿ ye^{n'}ē tanducué^{n'}ē maaⁿ.

6 'Tíicā chiiduú s'eeⁿ idiíⁿ yā nducué^{n'}ē. Nguuvi nguuvi chiiduú s'eeⁿ ngé^{n'}e yā na cuarto vmnááⁿ vmnaaⁿ ní diíⁿ yā ntiiⁿnyuⁿ ye^{n'}é yaācū ye^{n'}é Ndyuūs. 7 Ní na cuarto chi yaānūⁿ miiⁿ chi ndii 'úúví dámaāⁿ chiiduú ch'εεε ca indaa yā 'áámá vmne^{n'}éé nūⁿ ca'áámá ca'áámá nduuyū. Ní canéé chí candéé yā yuūⁿ ye^{n'}e 'iiti chi ca'a yā ofrenda Ndyuūs cáávā nuuⁿndi ye^{n'}é yā ní cáávā nuuⁿndi ye^{n'}ē taná^{n'}ā 'iiⁿyāⁿ. 8 Espíritu N'dai ye^{n'}é Ndyuūs ch'i^{n'}í yā s'uuúⁿ chi nguéé cuuvi ndaa yú nanááⁿ Ndyuūs né^{n'}é chi canéé yaācū ye^{n'}e tíinūⁿ caati yaacu tíinūⁿ miiⁿ ní ye^{n'}e compromiso chi vmnááⁿ vmnaaⁿ. 9 Ní nducué^{n'}ē chuū chi diíⁿ chiiduú s'eeⁿ ní canee tan'dúúⁿcā 'áámá ejemplo ye^{n'}ē tiempo ye^{n'}e yú. Chiiduú s'eeⁿ ní ca'a yā ofrendas nanááⁿ Ndyuūs ndúúⁿcū 'iiti chi n'giiⁿ'núⁿ yā cáávā ofrendas ye^{n'}ē nuuⁿndi ye^{n'}é yā. Chuū ní ne^{n'}ē caa^{n'}maⁿ chi ofrendas ndúúⁿcū 'iiti chi n'giiⁿ'núⁿ yā ní ca'a yā Ndyuūs nguéé cuuvi diiⁿ chi staava ye^{n'}e 'iiⁿyāⁿ s'eeⁿ ní δεενε ne^{n'}e chi 'tíicā chí nga'a yā ofrendas nanááⁿ Ndyuūs. 10 'Iiⁿyāⁿ s'eeⁿ dich'εεé yā Ndyuūs dámaāⁿ ndúúⁿcū cosas chi che'é yā ndúúⁿcū cosas chi cu'u yā ndúúⁿcū chiiⁿ chi diíⁿ yā chi cuuvi δεεvé yā staava ye^{n'}é yā. Nducué^{n'}ē chuū ní reglas chi diíⁿ yā ní canee chi diíⁿ yā 'tíicā ndii tiempo chi Ndyuūs n'daaⁿ yā dendu'ū ye^{n'}ē.

11 Cristo ní 'aā ndāa yā iⁿ'yeeⁿdí 'cūū. Ní maaⁿ ní Cristo miiⁿ ní chiiduú ch'εεε ca ye^{n'}e dendú'ū chi n'dai taavi ca. Ní yaācū naachi Cristo diíⁿ yā ntiiⁿnyuⁿ ní ch'εεε taavi ca ní n'daacā ca nguéé ti yaācū ye^{n'}e tíinūⁿ chi ye^{n'}ē iⁿ'yeeⁿdí 'cūū. Ní

'iiⁿ'yāⁿ s'eeⁿ nguéeⁿ n'dái yā yaācū chí ch'εεε ca. ¹² Ní Cristo ndāa yā chεεti yáacū ndíi cuarto yaānūuⁿ chí nguuví Lugar Δεεε N'dai Ca Yeⁿ'é Ndyuūs. Nguéeⁿ sndεé yā ndúúcū yuuúⁿ yeⁿ'e 'iiti chí chivo o daiyā vaca chí n'giiⁿ'nuⁿ yā naati ndúúcū yuuúⁿ yeⁿ'e maáⁿ yā. Ní 'tíicā sndāa yā dámaāⁿ 'aama vmnéⁿ'ēe na Lugar Δεεε N'dai Ca Yeⁿ'é Ndyuūs cáávā nducyaaca 'iiⁿ'yāⁿ. Ní maaⁿ ní nadanguáⁿ'ai yā s'uuúⁿ chí cuuvi yeⁿ'é yā s'uuúⁿ cueⁿ'e daāⁿmaⁿ. ¹³ Cuáácú chí yuūuⁿ yeⁿ'e itiindu ndúúcū yuūuⁿ yeⁿ'e chí chivo ndúúcū yaiyāā yeⁿ'e daiya vaca chí 'āā ngiichi vmnaaⁿ nátaī ní chiiduú s'eeⁿ ch'eeⁿ ndái yā vmnaaⁿ 'iiⁿ'yāⁿ chí véé nuuⁿndi yeⁿ'é yā ti yuūúⁿ cuuvi nadivεεε 'iiⁿ'yāⁿ cáávā ley yeⁿ'é yā. ¹⁴ Ní chuū ní cuaacu. Maaⁿ ní nééné n'daacā ca chí cuuvi diiⁿ yuūúⁿ yeⁿ'e Cristo nguéeⁿ ti yuūúⁿ yeⁿ'é 'iiti. Cucáávā Espíritu N'dai yeⁿ'é Ndyuūs chí canduuchi cueⁿ'é daāⁿmaⁿ, Cristo diiⁿ yā ofrecer cuerpo yeⁿ'e maáⁿ yā chí 'iiⁿ'yāⁿ s'eeⁿ 'caaⁿ'núⁿ yā 'yā cáávā ofrenda yeⁿ'é Ndyuūs, ofrenda chí n'daacā yeⁿ'ē. Ní yuūúⁿ yeⁿ'e Cristo ní cuuvi didεεε staava yeⁿ'ē yú yeⁿ'e nducuéⁿ'ē chí nadacadíinuⁿ yú chí nguéeⁿ n'daacā. Ní 'íicú cuuvi s'uuúⁿ ní dichíí'vē yú Ndyuūs chí canduuchi.

¹⁵ Cáávā chí Jesucristo diiⁿ yā 'áámá compromiso chí ngai, Jesucristo canée yā naavtáⁿ'ā yeⁿ'e 'iiⁿ'yāⁿ yeⁿ'e iⁿ'yeeⁿdí 'cūū ndúúcū Ndyuūs. Ní maaⁿ ní cuuvi ndaa yú nanááⁿ Ndyuūs. Ní cáávā chí ch'ii Cristo, Cristo ní cuuvi nadach'εεcú yā nuuⁿndi yeⁿ'e 'iiⁿ'yāⁿ chí cuneé yā mááⁿ compromiso chí vmnááⁿ vmnaaⁿ. Ní 'iiⁿ'yāⁿ chí Ndyuūs yaa'ví yā chí cuuvi yeⁿ'é yā, 'iiⁿ'yāⁿ s'eeⁿ cuuvi cuta'a yā chí cuuvi yeⁿ'é yā chí 'áámá cūnee chí Ndyuūs

ca'á yā 'iiⁿyāⁿ cucáá^{vā} Cristo. ¹⁶ Taachí 'iiⁿyāⁿ s'neeⁿ yā escrito yeⁿe herencia yeⁿé yā chi caⁿa yā ca'a yā taamá yā, 'iiⁿyāⁿ miiⁿ canee chi 'cuūvi yā vmnááⁿ vmnaaⁿ chi dichí^{vē} chiiⁿ chi canéé nguūⁿ. Chuū ní tan'dúú^{cā} 'áámá compromiso chi diíⁿ yā. ¹⁷ 'Iiⁿyāⁿ chi s'neeⁿ escrito yeⁿe herencia yeⁿé yā chí caⁿá yā ca'a yā taama yā, nguéé dichí^{vē} escrito yeⁿé yā neⁿe tiempo chí canduuchí yā. Naati taachi 'āā n'dīi yā tuu'mi ní dichí^{vē} chuū. Ní tan'dúú^{cā} 'áámá compromiso chí diíⁿ yā 'tíicā escrito miiⁿ. ¹⁸ Ní 'tíicā chííⁿ chí dichí^{vē} compromiso chí diíⁿ Ndyuūs vmnááⁿ vmnaaⁿ nduutí chí véé yuūúⁿ ti ch'iiⁿnúⁿ yā 'iiti. ¹⁹ Moisés caⁿa sa chíi sá nducyaaca mandamiento yeⁿe ley. Cuayiivi ní 'iiⁿyāⁿ caaⁿnúⁿ yā 'iiti ní Moisés sta'a sa yuūúⁿ yeⁿé daiya vaca ndúú^{cū} yuūúⁿ yeⁿé chivo ní ndástaⁿa sa nuūⁿnīⁿ ndúú^{cū} yuūúⁿ. Cuayiivi ní sta'á sa yuūúⁿ ndúú^{cū} duūdū 'iití cuūchī ndúú^{cū} 'áámá yaatā chí duuchi hisopo. Ní s'neéⁿ yā yuūúⁿ vmnaaⁿ libro yeⁿe ley ní vmnaaⁿ yeⁿé nducyaaca 'iiⁿyāⁿ dendú^ū. ²⁰ Ní ngaⁿá Moisés 'tíicā: Chuū ní yuūúⁿ chí 'áámá sello yeⁿe chí cuuvi cuaacu compromiso chí Ndyuūs ca'a yā orden chí ndís'tīi canee chí diíⁿ nī 'tíicā. ²¹ 'Tíicā ntúūⁿ Moisés s'neeⁿ sa yuūúⁿ miiⁿ vmnaaⁿ yeⁿe yaácū yeⁿe tíinūⁿ ní vmnaaⁿ yeⁿe tanducuén^ē dendú^ū chí ituneeⁿ na ntiiⁿnyuⁿ yeⁿé Ndyuūs. ²² Cuaacu chí tan'dúú^{cā} chí ngaⁿā ley 'téé 'téé nguéé nducuén^ē ní yuūúⁿ diiiⁿ chí canéé δεενε nducuén^ē. Ní Ndyuūs nguéé nadich^{εε} cú yā 'iiⁿyāⁿ yeⁿe nuuⁿndi yeⁿé yā nduuti chí nguéé ndúú^{cū} yuūúⁿ yeⁿé 'iiti chí 'caaⁿnúⁿ chiiduú s'eeⁿ.

Jesucristo ca'á yā maaⁿ cuerpo yeⁿ'é yā chi 'iiⁿ'yāⁿ s'eeⁿ 'caaⁿ'núⁿ yā 'yā lado yeⁿ'e ofrenda

23 'Tiicā nducuén'ē dendú'ū yeⁿ'e iⁿ'yeeⁿdí 'cūū canéé chi ndúúví δεενε ndúú^cū yuūúⁿ yeⁿ'e 'iiti. 'Téé 'téé nduuvi δεενε tan'dúú^cā δεενε na va'ai cheeti nguuvi. 'Tiicá ntúūⁿ cuuvi ndaa yú na va'ai cheeti nguuvi nduuti chi δεενε yú ndúú^cū yuūúⁿ yeⁿ'e táámá yā chi Cristo chí ch'εεε taavi ca nguéé ti ndúú^cū yuūúⁿ yeⁿ'e 'iiti. 24 Cristo nguéé cueⁿ'é yā sndaa yā na 'áámá yaacū chi δεενε taavi ca chi nin'dái saⁿ'ā yeⁿ'e iⁿ'yeeⁿdí 'cūū. Yaacū yeⁿ'e iⁿ'yeeⁿdí 'cūū 'tεε 'téé tan'dúú^cā yaacū chí δεενε taavi ca chi cuaacu níⁿ'nyúⁿ chi yaacū yeⁿ'é Ndyuūs. Cristo cueⁿ'é yā sndaa yā na va'ai cheeti nguuvi ní miiⁿ canee yā nanááⁿ Ndyuūs lado yeⁿ'e s'uuúⁿ. 25 Saⁿ'ā chiiduú ch'εεε ca yeⁿ'e iⁿ'yeeⁿdí 'cūū chi yeⁿ'e ndaata judíos chi Israel nduuyu nduuyu ndaá yā na Lugar δεενε N'dai Ca ndíí ná yaānūⁿ yeⁿ'e yaacū yeⁿ'e Ndyuūs ní ca'á yā Ndyuūs ofrenda chi yuūúⁿ yeⁿ'e 'iiti, ní nguéé yuūúⁿ yeⁿ'é yā chi ca'a yā. Naati Cristo ca'á yā vida yeⁿ'e maáⁿ yā caavā ofrenda 'áámá vmneⁿ'éé nūⁿ. 26 Nduuti chi Cristo canee chi diíⁿ yā tan'dúú^cā chi idiíⁿ chiiduú ch'εεε ca tuu'mi ní canéé chi 'cuūvi yā n'dee n'dái cuuvi ndíí tiempo chi Ndyuūs din'dái yā iⁿ'yeeⁿdí 'cūū ndíí chi 'cuiñū íⁿ'yeēⁿdí. Naati nguéé diíⁿ Cristo 'tíicā. Caati tiempo chi Ndyuūs s'neéⁿ yā ní Jesucristo 'áámá vmneⁿ'éé nūⁿ ch'ií yā ní ndāa yā nanááⁿ Ndyuūs chi nadach'εεcú yā nuuⁿndi yeⁿ'e nducyaaca 'iiⁿ'yāⁿ cucááⁿvā chi ca'a maáⁿ yā cuerpo yeⁿ'é yā chi 'iiⁿ'yāⁿ s'eeⁿ n'giíⁿ'núⁿ yā 'yā cááⁿvā ofrenda. 27 'Tiicá ntúūⁿ nducyaaca 'iiⁿ'yāⁿ yeⁿ'e

in'yeeⁿdí 'cūū canee chi 'cuūvi yā 'áámá vmnéⁿ'ēe. Níicú cuayiivi ní Cristo caⁿ'á yā n'diichí yā nuuⁿndi yeⁿ'e 'iiⁿ'yāⁿ s'eeⁿ. ²⁸ Ní 'tíicā Cristo 'áámá vmnéⁿ'ēe ca'á yā cuerpo yeⁿ'e maán yā cáávā ofrenda chi nadich'εεcú yā nuuⁿndi yeⁿ'e nducyaaca 'iiⁿ'yāⁿ. Ní taachi caⁿ'á yā ndaa yā taama vmnéⁿ'ēe nguéeⁿ ndaa yā cucáávā chi caⁿ'á yā nadíⁿ've yā nuuⁿndi yeⁿ'e nducyaaca 'iiⁿ'yāⁿ. Naati caⁿ'á yā nadanguáⁿ'ai yā nducyaaca s'uuúⁿ chi canéé ngiinu yú chi ndaa yā ndiichi ndii 'úúví cuuvi. Ndaa yā chi nadanguáⁿ'ai yā s'uuúⁿ.

10

¹ Ní ley yeⁿ'e Moisés ní tan'dúúicā 'daā'nú nūuⁿ 'tíicā ti nguéeⁿ 'áámá cūnee. Ní nguéeⁿ dáámá dáámá ndúúicū nducuéⁿ'ē vaadī cuaacu chi n'daacā chi cuchī. Ti cáávā chi ngaⁿ'a ley miiⁿ 'iiⁿ'yāⁿ s'eeⁿ nduuyu nduuyu 'caaⁿ'núⁿ yā 'iiti cáávā ofrenda cucáávā nuuⁿndi yeⁿ'é yā. Ní cáávā chuū, ζtaácā cuuvi ley miiⁿ diiⁿ chi 'iiⁿ'yāⁿ s'eeⁿ canéé n'daaca yā nanááⁿ Ndyuūs? ² Ti nduuti chi ley miiⁿ diiⁿ chi 'iiⁿ'yāⁿ s'eeⁿ canee n'daaca yā nanááⁿ Ndyuūs ní nguéeⁿ nuuⁿndi yeⁿ'é yā nanááⁿ Ndyuūs, tuu'mi ní 'āā ntéeⁿ 'caaⁿ'núⁿ yā 'iiti cáávā nuuⁿndi yeⁿ'é yā. Ní nguéeⁿ nadacadíⁿnuuⁿ yā yeⁿ'e chí chidεεvé yā yeⁿ'e nuuⁿndi yeⁿ'é yā. ³ Ní 'tíicā diiⁿ ley miiⁿ. Taachi n'giiⁿ'núⁿ yā 'iiti nduuyu nduuyu tuu'mi ní nan'gáácú yā yeⁿ'é nuuⁿndi yeⁿ'é yā. ⁴ Ti ndúúicū yuūúⁿ yeⁿ'e 'itííndú ndúúicū yuūúⁿ yeⁿ'e chivo 'iiⁿ'yāⁿ s'eeⁿ nguéeⁿ cuuvi didεεvé yā yeⁿ'é nuuⁿndi yeⁿ'é yā.

⁵ Ní cucáávā chuū taachi ndaá Cristo na in'yeeⁿdí 'cūū ngaⁿ'á yā ngī yā yeⁿ'é nduudu yeⁿ'é Ndyuūs

chi canéé nguūⁿ 'tíicā:

Díi, Ndyuūs, nguéé ne^{n'e} di chi 'iiⁿyāⁿ 'caaⁿnuⁿ yā 'iiti lado ye^{n'e} ofrenda ndíi nguéé ndúú chi ca'á yā 'iiti cáávā ofrenda ye^{n'e} di naati din'dái di 'áámá cuerpo ye^{n'e} chi ch'iindiyaáⁿ.

⁶ Ní nguéé ne^{n'e} di ofrendas ye^{n'e} chi nguuchí yā cuerpo ye^{n'e} 'iiti nátaī, ní nguéé ye^{n'e} chi 'caaⁿnúⁿ yā 'iiti cáávā chi Ndyuūs nadach'εεcú yā nuuⁿndi ye^{n'e} yā.

⁷ Dii Ndyuūs, 'úú ndaá iⁿ'yeeⁿdí 'cūū chi cuuvi díiⁿ chεē chi ne^{n'e} di chi díiⁿ caati 'tíicā canéé nguūⁿ ye^{n'e} 'úú na libro ye^{n'e} Ndyuūs naachi canéé nguūⁿ ley. ⁸ Vmnaáⁿ vmaaaⁿ nga^{n'a} Cristo: Dii Ndyuūs nguéé ne^{n'e} di ní nguéé yeenú di ndúúcū ofrendas ye^{n'e} chi n'giⁿ'núⁿ yā 'iiti, ní nguéé ye^{n'e} 'iiti chi tee yā dii. Ndíi nguéé ndúú ye^{n'e} chi n'giⁿ'núⁿ yā 'iiti ní ngiichí yā yuūtē ye^{n'e} 'iiti cáávā chi nadach'εεcu di nuuⁿndi ye^{n'e} yā. 'Tíicā nga^{n'a} Cristo 'áará chí 'iiⁿyāⁿ s'eeⁿ díiⁿ yā tan'dúúcā chi nga^{n'a} ley miiⁿ ye^{n'e} ofrenda chi canéé chi ca'á yā Ndyuūs. ⁹ Ní cuayi-ivi nga^{n'a} Cristo: Dii, Ndyuūs, 'úú ndaá na iⁿ'yeeⁿdí 'cūū chi cuuvi díiⁿ chεē chi ne^{n'e} di chi díiⁿ. Maaⁿ ní nducuén^e chuū ne^{n'e} caaⁿ'maⁿ 'tíicā. Ndyuūs divíi yā 'áámá lado ofrenda ye^{n'e} 'iiti chi 'iiⁿyāⁿ s'eeⁿ ch'iⁿ'núⁿ yā. Ní na lugar ye^{n'e} ofrenda miiⁿ Ndyuūs ca'á yā Cristo chí ch'īi yā. ¹⁰ Maaⁿ ní Ndyuūs didεévé yā s'uuúⁿ cáávā Jesucristo díiⁿ yā nducuén^e chi Ndyuūs ne^{n'e} yā chi diiⁿ yā. Ní 'áámá vmné^{n'}ee nūⁿ Jesucristo ca'á yā

cuerpo yeⁿe maáⁿ yā cáávā ofrenda chi 'iiⁿyāⁿ s'eeⁿ n'giiⁿ'núⁿ yā 'yā cáávā nuuⁿndi yeⁿe nducyáácá 'iiⁿyāⁿ.

¹¹ Ca'áámá cā'aama chiidūú judío chi Israel ngu-uvi nguuvi diíⁿ yā ntiiⁿnyuⁿ ní cheendii yā ní nga'á yā ofrenda dáámá daama nūⁿ nééné n'deēe cuūví 'áará chi ofrenda miiⁿ chi n'giiⁿ'núⁿ yā 'iiti nguéé cuuvi diví nuuⁿndi yeⁿe 'iiⁿyāⁿ mar 'áámá vmnéⁿ'ēe. ¹² Naati Jesucristo 'áámá vmnéⁿ'ee nūⁿ ca'á yā maaⁿ cuerpo yeⁿ'é yā chi 'iiⁿyāⁿ s'eeⁿ n'giiⁿ'núⁿ yā 'yā caavā ofrenda yeⁿe nuuⁿndi yeⁿe nducyáácú 'iiⁿyāⁿ. Ní cuayiivi cueⁿ'é yā na va'ai chεεti nguuvi ní ch'iindí yā na lado yeⁿe honor yeⁿ'é Ndyuūs chi lado tá cuaacu. ¹³ Maaⁿ ní Jesucristo canee ngiinú yā chi ndaa tiempo chi Ndyuūs idiíⁿ yā chi nducyaaca 'iiⁿyāⁿ chi contra yeⁿ'é yā canée yā maaⁿ ca'á Jesucristo tan'dúúcā chi 'áámá banco lííⁿ 'tiicá yā chi Jesucristo cuchéε yā yeⁿe yā. ¹⁴ Ní cáávā chi Cristo ca'á yā cuerpo yeⁿe maáⁿ yā chi 'iiⁿyāⁿ s'eeⁿ n'giiⁿ'núⁿ yā 'yā 'áámá vmnéⁿ'ee nūⁿ cáávā ofrenda tuu'mi ní Cristo diíⁿ yā chi dáámá cuuvi dεεv'é 'iiⁿyāⁿ ti nadach'εεcú yā nuuⁿndi yeⁿ'é yā. Ní 'iiⁿyāⁿ s'eeⁿ ní yeⁿe Ndyuūs cueⁿ'e daāⁿmaⁿ. ¹⁵ Ní Espíritu N'dai yeⁿ'é Ndyuūs ngaⁿ'a ndúúcu yú chi nducuén'ē chuū ní cuaacu. Vmnaáⁿ vmnaaⁿ ngaⁿ'a Ndyuūs chuū:

¹⁶ Chuū chi diíⁿ prometer chi diíⁿ caavá yā cuayi-ivi chi ch'ó'ōo nguuvi s'eeⁿ, ngaⁿ'a Ndyuūs. Cu'neéⁿ ley yeⁿ'é na staava yeⁿ'é yā. Ní dinguúⁿ ley yeⁿ'é na vaanicadínūⁿ yeⁿ'é yā.

¹⁷ Ní cuayiivi ngaⁿ'á yā:

Āā ntéé nan'gaacú nuuⁿndi yeⁿ'é yā ní nguéé ndu-

cuéⁿē chi diíⁿ yā chi nguéé n'daacā. ¹⁸ Níicú taachi Ndyuūs nadich'εεcú yā nuuⁿndi yeⁿé 'iiⁿyāⁿ s'eeⁿ tuu'mi ní 'āā ntéé canéé chi ca'á yā ofrendas chi 'caaⁿ'núⁿ yā 'iiti cáávā nuuⁿndi yeⁿe yā.

Canéé chi nan'gaacu yú yeⁿe Ndyuūs yeⁿe yú

¹⁹ Tíicā níhermanos yeⁿé maaⁿ ní cuuvi nandaa yú nanááⁿ Ndyuūs na cuarto chi Δεεε N'dai Ca na yaācū yeⁿé Ndyuūs ti véé 'viich'εεtíinūuⁿ yeⁿē yú nanááⁿ Ndyuūs cáávā yuūúⁿ yeⁿe Señor Jesucristo. ²⁰ Ní Jesucristo nn'guaaⁿ yā 'áámá yúúni chí n'dai ní canduuchi taachi chíí nteen yā tীনūuⁿ yeⁿe yaācū. Tীনūuⁿ miiⁿ ní neⁿe caaⁿ'maⁿ chi tan'dúúcā cuerpo yeⁿe maáⁿ Cristo taachí ch'iī yā, 'tíicā va. Maaⁿ ní cuuvi ndaa yú na cuarto chi yaānūuⁿ nanááⁿ Ndyuūs caavá yā. ²¹ Ní Jesucristo ní chiiduú ch'εεε ca yeⁿe yú ní diíⁿ yā ntiiⁿnyuⁿ yeⁿe yaācū yeⁿe Ndyuūs. ²² Maaⁿ ní canéé chí indaa yú nanááⁿ Ndyuūs ndúúcū núúⁿmáⁿ staava yeⁿe yú ní 'áámá canee yú ndúúcū chi i'téénu yú. Cristo miiⁿ 'āā didεεvé yā staava yeⁿe yú yeⁿe nuuⁿndi yeⁿe yú caati nguéé nadacadíinuuⁿ ca yú yeⁿe castigo yeⁿe nuuⁿndi chi diiⁿ yú. Ní nadíδεεε yā cuerpo yeⁿē yú ndúúcū nuūⁿnīⁿ δεεεε. ²³ Maaⁿ ní diiⁿ yú chi 'áámá canee yú ndúúcū chi ngaⁿ'a yú chi i'téénu yú caati deenu yú chi Ndyuūs caⁿ'á yā diíⁿ yā cumplir compromiso yeⁿe chi caⁿ'a yā chi téé yā s'uuúⁿ. ²⁴ Ní s'uuúⁿ canéé chí inadícadíinuuⁿ yú táácā cuuvi cunnee yú 'aama yú taama yú ní dineⁿe yú 'aama yú taama yú ní diiⁿ yú dendu'ū chi n'daacā. ²⁵ Ní nguéé diiⁿ yú chi nguéé nduu-vidaama yú cheeti yaācū tan'dúúcā chí diiⁿ náⁿ'a

yā. Naati ca'a yú consejo 'aama yú taama yú caati deenu yú chi nguuvi chi ndaa Cristo taama vmnéⁿēe 'āā snee niiⁿnuúⁿ.

²⁶ Ní nduuti chi idiiⁿ yú nuuⁿndi caati maaⁿ yú neⁿe yú cuayiivi chi 'āā deenu yú nduudu cuaacu yeⁿ'é Ndyuūs tuu'mi ní 'āā ntεε véé taama ofrenda chi cuuvi ca'a yú Ndyuūs cáávā nuuⁿndi yeⁿ'e yú chi Ndyuūs divíi yā nuuⁿndi yeⁿ'e yú. ²⁷ Dámaāⁿ 'va'a yú neⁿ'e chi cunee ngiinu yú yeⁿ'e chi cuchiī. Cristo caⁿ'á yā n'diichi yā nuuⁿndi yeⁿ'ē yú ní ndúúcū yaⁿ'ā íngiichi chi cuucu tanducuéⁿ'ē 'iiⁿ'yāⁿ chi contra yeⁿ'é Ndyuūs. ²⁸ Deenu yú yeⁿ'e 'iiⁿ'yāⁿ chi nguéé diíⁿ yā cuenta yeⁿ'e ley yeⁿ'e Moisés. Nduuti chi véé 'uuvī o 'iinū 'iiⁿ'yāⁿ chi ngan[']ā nduudu cuaacu yeⁿ'e falta yeⁿ'é yā tuu'mi ní ch'ii 'iiⁿ'yāⁿ miiⁿ. Ní nguéé ya'ai 'iiⁿ'yāⁿ s'eeⁿ taachi ch'īi yā.

²⁹ Maaⁿ ní nadacadíinuⁿ yú yeⁿ'e 'iiⁿ'yāⁿ s'eeⁿ chi nguéé diíⁿ yā cuenta yeⁿ'e yuūúⁿ yeⁿ'e Cristo chí cuuví δεεεε 'iiⁿ'yāⁿ s'eeⁿ. 'Iiⁿ'yāⁿ s'eeⁿ ngaⁿ'a taán yā yeⁿ'e Espíritu N'dai yeⁿ'é Ndyuūs. ¿De'ē chúúcā n'dee ca castigo véé yeⁿ'é 'iiⁿ'yāⁿ s'eeⁿ? ³⁰ Deenu yú chi Señor ní ngaⁿ'a yā 'tíicā: 'Úú canéé chí ca'á castigo 'iiⁿ'yāⁿ. 'Úú idīiⁿ chi 'iiⁿ'yāⁿ nadíi'vε yā chiin chi diíⁿ yā chi nguéé n'daacā. Chuū dendú'ū ngaⁿ'a Señor miiⁿ: Señor miiⁿ caⁿ'á yā n'diichi yā nuuⁿndi yeⁿ'e 'iiⁿ'yāⁿ yeⁿ'é yā. ³¹ De'ē chúúcā ya'āi yeⁿ'e yú. Nééné 'va'a yú chi ndaa yú nanááⁿ Ndyuūs chi cānduuchi chi diíⁿ yā castigar s'uuúⁿ nduuti chi nguéé n'daacā idiiⁿ yú.

³² Maaⁿ ní n'gaacú nī yeⁿ'ē nguuvi s'eeⁿ chi 'āā chó'ōo chi caama n'diichí nī ní s'téenu nī Jesu-

cristo, ní cuayiivi chi chéé nī ch'eenú nī chiī yeⁿe tanducuéⁿē dendu'ū cucáávā chi díⁿ nī luchar yeⁿē chi i'téenu nī. ³³ Náⁿ'a nī ch'eenú nī chiī ní 'cuináaⁿ nī taachi 'iiⁿ'yāⁿ sta'á yā ndís'tiī ní ngaⁿ'a taáⁿ yā yeⁿe ndís'tiī ní ch'eⁿé yā ndís'tiī nanááⁿ n'deee n'dái 'iiⁿ'yāⁿ. Ní taachi 'tíicā díⁿ yā ndúúcū naⁿ'ā hermanos yeⁿe yú neⁿ'é nī 'cueenú nī cuuvi nduucú yā. ³⁴ Ní taachi náⁿ'ā hermanos ch'eenú yā chiī chi caneé yā vácūū, ndís'tiī ní ya'ái nī hermanos s'eeⁿ. Ní taachi 'iiⁿ'yāⁿ sta'á yā nducuéⁿē chi véé yeⁿe nī ndís'tiī ní chichεε nī yeⁿe nducuéⁿē. Ní yeenú nī caati deenú nī chi véé chi cuuvi yeⁿ'é nī chi n'dai taavi ca ná va'ai chεεti nguuvi chí cueⁿe daāⁿmaⁿ 'áámá cūnee yeⁿe nī. ³⁵ Maaⁿ ní nguéé di'vaachí nī ti nguéé véé confianza yeⁿ'é nī ndúúcū Ndyuūs caati ndúúcū chi i'téenu nī cuuvi díⁿ nī ganar cosas chi n'daacā taavi ca. ³⁶ Ní ndís'tiī ní canéé chi cuchéé nī yeⁿe nducuéⁿē ní díⁿ nī nducuéⁿē chi Ndyuūs neⁿ'é yā chi díⁿ nī. Ní 'íicú cuuvi cuta'á nī yeⁿe chi véé yeⁿ'é nī chi Ndyuūs caⁿ'a yā chi téé yā ndís'tiī. ³⁷ Canéé nguūⁿ na libro yeⁿ'é Ndyuūs 'tíicā:

'Āā ntεε 'nááⁿ tiempo ní Señor chi canéé chi ndaa ní ndaa yā. Ní 'āā ntéé cuuvi 'náaⁿ yā. ³⁸ Ní ngaⁿ'a yā 'tíicā:

'Iiⁿ'yāⁿ chi yeⁿ'é ní δεεvé yā tí i'téenu yā 'úú ní canduuchi yā cueⁿe daāⁿmaⁿ. Ní nduuti chi 'aama yā ndaacadaamí yā yeⁿ'é tuu'mi ní 'úú nguéé yeenú yeⁿe yā. ³⁹ Maaⁿ ní s'uuúⁿ ní nguéé tan'dúúcā 'iiⁿ'yāⁿ chi ndaacadaamí yā yeⁿe Cristo ní chindai yā. Nguéé 'tíicā s'uuúⁿ. S'uuúⁿ ní i'téenu yú Cristo ní Cristo nadanguáⁿ'ai yā s'uuúⁿ.

11

Yen'e chi i'teenu yú Jesucristo

¹ Cáávā chi i'teenu yú Ndyuūs deenu yú chi seguro chi cuta'a yú ye^{n'}ē chi canee ngiinu yú. Ní deenu yú chí cuuvi cuaacu ye^{n'}e dendu'ū chi nguée inaaⁿ yú. ² Ní tiempo chi 'āā chó'ōo 'ii^{n'}yāⁿ nga^{n'}á yā chi 'ii^{n'}yāⁿ chi diíⁿ yā ntiiⁿnyuⁿ ye^{n'}e Ndyuūs ní n'dááca yā nanááⁿ Ndyuūs ti i'téenu yā Ndyuūs.

³ Ní deenu yú cucáávā chi i'teenu yú Ndyuūs, chí chiiⁿ chí inaaⁿ yú ní cáávā chi Ndyuūs din'dái yā í^{n'}yeeⁿdī ní nguée dε'ē vεε.

⁴ Ní cáávā chi sa^{n'}ā Abel ní i'téenu sa Ndyuūs, ca'a sa 'áámá ofrenda chí n'daacā ca nguée ti sa^{n'}a Caín miiⁿ. Ní Ndyuūs n'diichí yā chi ofrenda ye^{n'}e Abel miiⁿ ní n'daacā ca ní sta'á yā ofrenda miiⁿ. Ní Ndyuūs n'diichí yā chi Abel ní n'daacā sa. Ní cáávā chí Abel i'téenu sa Ndyuūs 'áará chí ch'iī sa^{n'}ā miiⁿ ndíí maaⁿ ní nga^{n'}a 'ii^{n'}yāⁿ ye^{n'}e vaadī i'téenu ye^{n'}ē sa.

⁵ Cáávā chi sa^{n'}ā Enoc i'téenu sa Ndyuūs, nguée ch'iī sa ti Ndyuūs candée yā sa^{n'}ā miiⁿ na va'ai chεεti nguuvi. 'Ii^{n'}yāⁿ ye^{n'}é yā 'āā ntée ndaacá yā sa^{n'}ā miiⁿ ti Ndyuūs candée yā sa^{n'}ā miiⁿ nduucú yā. Canée nguūⁿ na libro ye^{n'}e Ndyuūs 'tíicā: Taachi 'āā cuée candée Ndyuūs sa^{n'}ā miiⁿ, Ndyuūs canee yiinú yā chí idiiⁿ sa. ⁶ Mar 'áámá 'ii^{n'}yāⁿ nduuti chí nguée i'téenu yā Ndyuūs, Ndyuūs nguée cunee yiinú yā 'ii^{n'}yāⁿ. Nduuti chí 'ii^{n'}yāⁿ ne^{n'}é yā ndaa yā nanááⁿ Ndyuūs canee chí cu'téenu yā chí véé Ndyuūs. Ní Ndyuūs ca^{n'}a yā chí ca'a yā chí véé chí cuuvi ye^{n'}é 'ii^{n'}yāⁿ chí n'nuúⁿ yā Ndyuūs.

7 Ní cáávā saⁿā Noé i'téenu sa Ndyuūs ní n'giindiveeⁿ sa nduudu yeⁿe Ndyuūs taachi Ndyuūs yaa'ví yā cosas chi caⁿ'á yā diíⁿ yā. 'Áará chi nguée^e inaaⁿ sa cosas miiⁿ n'giindiveeⁿ sa nduudu yeⁿ'é Ndyuūs ní din'dái sa 'áámá arca chi barco ch'εετε ní 'íicú cuuvi nanguáⁿāī 'iiⁿ'yāⁿ yeⁿ'ē sa na vaacú sa. 'Túúcā Noé diiⁿ sa condenar 'iiⁿ'yāⁿ yeⁿ'e iⁿ'yeeⁿdí 'cūū caati i'téenu sa Ndyuūs. Ní Ndyuūs didεενέ yā Noé chi cuuvi yeⁿ'é yā caati i'téenu sa Ndyuūs.

8 Ní cáávā saⁿā Abraham i'téenu sa Ndyuūs, ch'iindiveeⁿ sa nduudu yeⁿe Ndyuūs taachi Ndyuūs yaa'ví yā Abraham. Ní yaa'ví yā saⁿā chi canéé chí caⁿ'a sa táámá yáⁿ'āa chi caⁿ'a Ndyuūs chi cuuvi yeⁿ'ē sa. Ní s'neeⁿ sa yāāⁿ vaacú sa ní cuéⁿ'e sa. Ní nguée^e déenu sá tíí ndíí caⁿ'a sa. 9 Ní cáávā chi Abraham i'téenu sa Ndyuūs, canee sa na yáⁿ'āa chi Ndyuūs caⁿ'a yā chi ca'a yā. Ní miiⁿ canee sa tan'dúúcā 'iiⁿ'yā chi canúúⁿ yúúⁿí. Ní canúúⁿ sá va'āī tíínūuⁿ ndúúcū daiya sa chi Isaac ndúúcū Jacob. Ní 'āā daamá nūuⁿ cuuvi yeⁿ'é yā yeⁿ'ē chí cuuvi yeⁿ'e Abraham miiⁿ. 10 Abraham miiⁿ ní cūnee ngíínu sa yāāⁿ chi Ndyuūs 'āā din'dái yā tan'dúúcā chi Ndyuūs nadacádíínuuⁿ yā. Yāāⁿ miiⁿ chi 'áámá cūnee cimientó yeⁿ'ē ní va'ai chεeti nguuvi.

11 Ní cáávā chi Sara i'téenu tá Ndyuūs, ní ditīnú ca tá chi taavi tá daiya tá. Sta'a tá poder yeⁿ'e Ndyuūs ní ch'iīndī daiya tá taachi 'āā ndiicūū ta tí i'téenu tá chi Ndyuūs diíⁿ yā cumplir nduudu chi ngaⁿ'a yā. 12 Ní 'tíicā Abraham miiⁿ 'āā ndiicūū ca yā chi cuuvi chiidá yeⁿ'e daiyá yā. Ní n'daataá yeⁿ'é

yā chi Sara miiⁿ 'āā ndiicū ca ntúuⁿ tá. Naati ná 'iiⁿyāⁿ yeⁿ'é yā ichii n'dee n'dái 'iiⁿyāⁿ tan'dúúcā 'ííⁿnyúⁿ yeⁿ'e nanguuvi ní tan'dúúcā yáⁿ'āa ndúutī chi véé cuaaⁿ 'diituú yíícú chi s'uuúⁿ nguéé ngii iduuche yú.

¹³ Nducyaaca 'iiⁿyāⁿ s'eeⁿ ch'īi yā naati i'téenu yā Ndyuūs. Nguéé sta'á yā cosas chi Ndyuūs caⁿ'a yā chi ca'a yā naati i'téenu yā ní n'diichi chi yaⁿ'ái yā cosas chi Ndyuūs caⁿ'a yā chí ca'a yā. Ní yeenu yā. Ní 'iiⁿyāⁿ s'eeⁿ ngaⁿ'a yā chii yā nducyáácá 'iiⁿyāⁿ chi tan'dúúcā 'iiⁿyāⁿ chi snúúⁿ yúúní, 'tiicá yā 'naaⁿ tiempo chi snée yā iⁿ'yeeⁿdí 'cū. ¹⁴ Ní nducyaaca 'iiⁿyāⁿ chi ngaⁿ'á yā 'tíicā ch'iⁿ'i yā chi in'nuúⁿ yā táámá nación chí n'dai chí cuuvi yeⁿ'e yā. ¹⁵ Ní nduuti chi nn'gaacú yā yeⁿ'e yáⁿ'āa naachi chiicá yā tuu'mi ní cuuvi nguεεcunée yā ní ndaa yā na yāāⁿ miiⁿ. ¹⁶ Naati 'iiⁿyāⁿ s'eeⁿ neⁿ'é yā táámá nación chi n'daacā ca chí yeⁿ'e va'ai chεeti nguuvi. Ní cáávā chuū Ndyuūs nguéé 'cuináaⁿ yā taachi 'iiⁿyāⁿ s'eeⁿ ngaⁿ'a yā 'tíicā: N'diī Ndyuūs ní Ndyuūs yeⁿ'é yú. Ndyuūs 'āā véé yaáⁿ yā 'áámá yāāⁿ chi cuuvi yeⁿ'e 'iiⁿyāⁿ s'eeⁿ.

¹⁷ Ní cáávā chi Abraham miiⁿ i'téenu yā Ndyuūs, n'giindiveéⁿ yā yeⁿ'e Ndyuūs taachi Ndyuūs n'diichinéeⁿ yā Abraham. Ní Abraham ní caⁿ'á yā ca'á yā daiyá yā Isaac cáávā lado yeⁿ'e ofrenda chi 'caaⁿ'núⁿ yā daiyá yā. Ní canee listo yā chi ca'á yā 'áámá n'dyaⁿ'ā daiyá yā lado yeⁿ'e ofrenda miiⁿ 'áará chí Ndyuūs ca'á yā 'áámá compromiso chi 'tíicā: ¹⁸ Díí, Abraham, cáávā daiya di Isaac 'úú ní teé dii n'dee n'dái taavi cuuvi ndaata yeⁿ'e di. ¹⁹ Ní Abraham miiⁿ tuumicádíínuuⁿ yā chi Ndyuūs cuuví nadacuéeⁿ yā 'iiⁿyāⁿ s'eeⁿ yeⁿ'e

nguaaⁿ tináⁿā. Ní Abraham déénu sa chi Ndyuūs cuuvi nadacuéeⁿ yā daiya sa yeⁿē nguaaⁿ tináⁿā, naati nguéeⁿ ch'iī sa. Abraham miiⁿ candéε sa daiya sa na vaacú sa.

20 Ní cáávā chi Isaac i'téenu sa Ndyuūs, ngaⁿa sa chi caⁿa sa di'viicú sa daiya sa Jacob ndúúcū saⁿā Esaú. Ní ngaⁿā sa yeⁿe cosas n'dai chi cuchī. 21 Ní cáávā chi Jacob i'téenu sa Ndyuūs, taachi 'āā cháā 'cuuvi sa di'viicu sa ca'áámá ca'áámá daiya yeⁿē daiya José. Ní cuayiivi ní dich'εεεε sá Ndyuūs neⁿe chí sta'a sa in'daacúú yeⁿē sa. Ní yiin'diicúneeⁿ sa na in'daacúú yeⁿē sa. 22 Ní cáávā chi José i'téenu sa Ndyuūs taachi 'āā cháā 'cuuvi sa ngaⁿa sa yeⁿe tiempo chi 'iiⁿyāⁿ yeⁿe ndaata Israel nan'dáa yā ná yáⁿāa Egipto. Ní yaa'vi sa 'iiⁿyāⁿ yeⁿe chí canéé chí díⁿ yā ndúúcū 'iini yeⁿe sa taachi tináⁿā sa.

23 Ní cáávā chi i'téenu yā Ndyuūs chiida sa ní chεεcu sa Moisés, taachi ch'iindiyaāⁿ Moisés miiⁿ chinuun'dé'ei yā saⁿā 'líⁿ miiⁿ na 'iinu 'iyyū. N'diichi yā daiyá yā chí Moisés miiⁿ saⁿā 'líⁿ sa neené n'dεεvéε sa. Nguéeⁿ di'vá'a yā yeⁿe orden yeⁿe rey chí canéé chí 'caaⁿnúⁿ yā saⁿā 'líⁿ miiⁿ. 24 Cáávā chí Moisés i'téenu sa Ndyuūs, ní tááchí ch'εεε sa nguéeⁿ 'cuūⁿ sa chí 'iiⁿyāⁿ ngaⁿá yā chí Moisés ní daiya n'daataa daiyá rey yeⁿe yáⁿāa Egipto. 25 Naati Moisés miiⁿ neⁿe sa 'cueenu ca sá cuuvi ndúúcū 'iiⁿyāⁿ chí yeⁿe Ndyuūs. Ní nguéeⁿ 'cuūⁿ sa chí yeenú sa 'áámá tiempo ndúúcū vaadī yeenú chí dinuuⁿndi sa. 26 Ní Moisés miiⁿ nadacádíⁿnuuⁿ sa chí n'daacā ca chí 'cueenu sa cuuvi tan'dúúcā chí ch'eenu Cristo chí na yáⁿāa 'cūú ní nguéeⁿ ti chí cuuví yeⁿe sa tanducuéⁿē vaadī 'cuiica chí véé na yáⁿāa Egipto. Ní 'tíicā nacádíⁿnuuⁿ

sa caati deenu sa chi Ndyuūs caⁿ'á yā ca'a yā chi véé chi cuuvi yeⁿ'e sa. ²⁷ Ní cáávā chi Moisés i'téenu sa Ndyuūs, nan'dáa sa yeⁿ'e yáⁿ'āa Egipto ní nguée 'va'a sa chi nduuvi taaⁿ rey. Ní díitu canee sa chi i'téenu sa Ndyuūs tan'dúúcā chi n'diichi sa Ndyuūs 'áará chi nguée inaaⁿ sa Ndyuūs.

²⁸ Ní cáávā chi Moisés i'téenu sa Ndyuūs s'neeⁿ sa orden yeⁿ'e 'viicu pascua chi 'iiⁿ'yāⁿ canéé chí s'neéⁿ yā yuúúⁿ yeⁿ'e 'iiti cuūchī na cheendī va'ai yeⁿ'é yā caati taachi ndaa ángel chi n'giiⁿ'nuⁿ yā nducyaaca da'caīyāa saⁿ'ā chi vmnááⁿ vmaaaⁿ, nguée cuuvi 'caaⁿ'núⁿ yā da'caīyāa chi yeⁿ'é ndaata yeⁿ'é Israel. ²⁹ Ní cáávā 'iiⁿ'yāⁿ yeⁿ'e ndaata Israel i'téenu yā Ndyuūs, chícho'ó yā naavtaⁿ'ā yeⁿ'e mar chi nguuvi Rojo ní ngiicá yā ndii yáⁿ'āa cuūⁿmáⁿ. Ní cuayivi ní taachi cho'o 'iiⁿ'yāⁿ s'eeⁿ yeⁿ'e yáⁿ'āa Egipto tuu'mi ní chí'i nuūⁿnīⁿ 'iiⁿ'yāⁿ ní nducyaaca yā ch'i yā ti nduuidaāⁿmáⁿ nuūⁿnīⁿ.

³⁰ Ní cáávā 'iiⁿ'yāⁿ yeⁿ'e ndaata Israel i'téenu yā Ndyuūs, cheⁿ'e yā nuuⁿmaⁿ ndiivi chēēⁿtī yeⁿ'e yāāⁿ Jericó ndēēchē nguuvi. Tuu'mi ní ch'iinu miiⁿ ní chíndēēve chēēⁿtī yeⁿ'e yāāⁿ miiⁿ. ³¹ Ní cáávā chi Rahab i'téenu tá Ndyuūs, ní 'áará chi cueⁿ'e tá ndúúcū saⁿ'ā s'eeⁿ, nguée ch'iī tá ndúúcū 'iiⁿ'yāⁿ s'eeⁿ yeⁿ'e yāāⁿ yeⁿ'e tá chi nguée i'téenu yā Ndyuūs; ti n'daata miiⁿ ní sta'a tá saⁿ'ā s'eeⁿ yeⁿ'e Israel. Ní n'daacā idiiⁿ tá ndúúcū saⁿ'ā s'eeⁿ chí 'dííⁿ 'dííⁿ ndaá yā nguaaⁿ 'iiⁿ'yāⁿ yeⁿ'e tá chi cuuvi deenú yā táácā canee 'iiⁿ'yāⁿ yeⁿ'e tá.

³² Maaⁿ ní ¿de'ē cá cuuví caaⁿ'máⁿ ndís'tiī? Nguée véé tiempo chí cuuví ndís'tiī yeⁿ'e saⁿ'ā Gedeón ní yeⁿ'e saⁿ'ā Barac, ní yeⁿ'e saⁿ'ā Sansón, ní yeⁿ'e saⁿ'ā Jefté, ní yeⁿ'e saⁿ'ā David, ní yeⁿ'e saⁿ'ā Samuel,

ní ye^{n'e} sa^{n'ā} profetas chi candεε nduudu ye^{n'é} Ndyuūs. ³³ Nducyaaca 'ii^{n'yā} s'eeⁿ ní cáávā chi i'téenu yā Ndyuūs idiiⁿ caandá yā ní cuchεé yā ye^{n'e} ná^{n'ā} paises. Ní n'daacā nga^{n'a} ntiinyuⁿ yā ye^{n'e} taná^{n'ā} yāāⁿ. Ní tuneéⁿ yā chí Ndyuūs nga^{n'a} yā chíⁿ chí ca'a yā. Ní diiⁿ yā chi nduūdi cheendi 'yáínyāⁿ cuá'aá. ³⁴ Ní ya^{n'ā} chi diitu n'dái ngi-ichi nguéeⁿ cuuvi 'tuuví 'ii^{n'yā} s'eeⁿ chi i'téenu yā Ndyuūs. Ní n'géenu yā ye^{n'e} 'ii^{n'yā} chi ne^{n'é} yā 'caa^{n'nú} yā 'yā ndúúcu machete chi 'caāiⁿ ndúú 'uuvi lados. Ní áará chi duūvá yā ditiinú yā. Ní taachi diiⁿ caandá yā ní ditiinú yā chí 'caa^{n'nú} yā. Ní cheε yā ye^{n'e} n'deee n'dái soldados ye^{n'e} enemigos ye^{n'é} yā. ³⁵ Ní cáávā chi n'daataa s'eeⁿ i'téenu yā Ndyuūs, nta'á yā tiná^{n'ā} chi n'dii ye^{n'e} familia ye^{n'é} yā taachi 'āā nduuchí yā ye^{n'e} nguaaⁿ tiná^{n'ā}. Ní ná^{n'ā} 'ii^{n'yā} ch'éenu yā chii ní ch'íi yā. Ní nguéeⁿ 'cūuⁿ yā chi nngua^{n'ai} yā ti ne^{n'é} yā n'diichí yā táámá vida chi n'daacā ca. ³⁶ Ná^{n'a} yā ní 'ii^{n'yā} s'eeⁿ duuchí yā ye^{n'e} yā ní ch'e^{n'é} yā 'ii^{n'yā}. Ní ná^{n'a} yā ní 'ii^{n'yā} s'eeⁿ ch'εε chiichí yā ndúúcu cadenas ní che^{n'é} yā vácūū. ³⁷ Ní ná^{n'a} yā ní 'ii^{n'yā} s'eeⁿ ca'a tuúú yā 'ii^{n'yā} ní ch'íi yā. Ní ná^{n'a} yā ní 'ii^{n'yā} s'eeⁿ n'deé yā nduu 'uuví taaⁿ yā ndúúcu cierra. Ní ná^{n'a} yā 'ii^{n'yā} s'eeⁿ n'gi^{n'nu} yā 'ii^{n'yā} ndúúcu machete chi 'úúvī lados 'caāiⁿ. Ná^{n'a} yā ní ch'εε chiicá yā ndíí 'muuⁿ ndíí miiⁿ ndúúcu catecai yā ye^{n'e} 'iiti cuūchī ní ye^{n'e} diiⁿmaⁿ chivo. Ní pobre yā ní ch'eenú yā chiī. Ní nguéeⁿ din'daacá 'ii^{n'yā} s'eeⁿ ndúúcu yā. ³⁸ Ní 'ii^{n'yā} chi ch'eenú yā chii cáávā chi i'téenu yā Ndyuūs, 'ii^{n'yā} ye^{n'e} í^{n'yee}ndí nguéeⁿ n'daacā ca chi cuuvi cūneé yā ndúúcu yā.

'Iiⁿyāⁿ chí i'téenu yā ngeⁿ'é yā 'muuⁿ ngeⁿ'é yā miⁿ ní tan'dúúcā 'iiⁿyāⁿ chí ngu^{éé} vaacú yā, 'tiicá yā. Chiicá yā yáⁿ'āa cuuⁿmaⁿ naachi ngu^{éé} ch'εetinéé 'iiⁿyāⁿ. Ní chiicá yā na cu^{éé}tí ní ná yiivi yáává yeⁿ'e 'iiti o yiivi yáⁿ'āa naachi 'cu^εetinéé yā. ³⁹ Cáávā chí 'iiⁿyāⁿ s'eeⁿ chí i'téenu yā Ndyuūs, n'dai yā ndúúcū nducuéⁿ'ē chí Ndyuūs 'cūuⁿ yā chí n'geenu yā ngii ndíi tiempo chí ch'iⁱ yā. 'Āā cu^{éé} cuta'a yā chí cuuvi yeⁿ'e yā chí Ndyuūs caⁿ'a yā chí ca'a yā, ⁴⁰ caati Ndyuūs nadacádíinuⁿ yā chí caⁿ'á yā diiⁿ yā chí n'daacā ca cááva yā ní cáávā s'uuúⁿ. 'Iiⁿyāⁿ s'eeⁿ ngu^{éé} cuuvi cuta'á yā chí cuuvi yeⁿ'é yā ndíi tiempo chí s'uuúⁿ cuuvi cuta'a yú chí cuuvi yeⁿ'e yú.

12

Cueⁿ'e daāⁿmaⁿ snaaⁿ yú yeⁿ'e Jesús

¹ Maaⁿ ní deenu yú cáávā vida yeⁿ'ē n'dee n'dái 'iiⁿyāⁿ chí ch'iⁱ yā ti ch'iⁿ'í yā s'uuúⁿ táácā cuuvi cu'teenu ca yú Ndyuūs. Ní cáávā chuū canee chí cū[']neeⁿ yú tanducuéⁿ'ē dendu'ū chí di'vaachi s'uūúⁿ ndúúcū nuuⁿndi chí diiⁿ yú caati nuuⁿndi míⁿ diiⁿ chí cuuvi ndai yú. Ní caānu yú ndúúcū ngiīnū carrera yeⁿ'e vida yeⁿ'ē yú chí Ndyuūs itée yā s'uuúⁿ. ² Ní cueⁿ'e daāⁿmāⁿ snaaⁿ yú Jesús ti diiⁿ yā chí cuuvi i'téenu yú 'yā. Ní diiⁿ yā chí n'daacā ca cuuvi cu'teenu yú. Jesucristo ní ch'eenú yā chíi taachi ch'iⁱ yā na cruz. Ní ngu^{éé} diiⁿ yā cuenta chí 'cuinaáⁿ yā cucáávā chí ch'iⁱ yā tan'dúúcā chí n'giiⁿ'nuⁿ yā 'iiⁿyāⁿ caati deenú yā chí yeenú yā cuayivi ti cuuví nadanguáⁿ'ai yā 'iiⁿyāⁿ. Maaⁿ ní ve^é yā na lado yeⁿ'e honor yeⁿ'e trono yeⁿ'e Ndyuūs.

³ Ndís'tiī, nadacadíínuuⁿ nī tan'dúúcā Jesucristo chi ejemplo yeⁿe yú. Ch'eenú yā chiī cucáávā 'iiⁿyāⁿ s'eeⁿ chi dinuuⁿndí yā. Ní 'íicú ndís'tiī nguéé cuuvi 'daan'dí nī ní nguéé s'neéⁿ nī chiīⁿ chi i'téenu nī. ⁴ Ndís'tiī ní 'āā chichεε nī ndúúcū nuūⁿndí ní nguéé ch'eenú nī chiī ndíí chi 'āā n'dīi nī. ⁵ ¿'Āā nguéé n'gaacú ndís'tiī consejo chi Ndyuūs ca'á yā ndís'tiī chi daiyá yā? Canéé nguūⁿ na libro yeⁿé Ndyuūs 'tíicā:

Díí, daiyá, nguéé nadacadíínuuⁿ nī chi nguéé de'ε vεε taachi Ndyuūs diíⁿ yā castigar ndís'tiī caati cuuvi deenú nī chi nguéé n'daacā idiíⁿ nī. Ní nguéé ndaacadáámí nī yeⁿé yā taachi diíⁿ yā castigar ndís'tiī.

⁶ Señor yeⁿe yú yaa'vineéⁿ yā nducyáácá 'iiⁿyāⁿ chi neⁿé yā ní diíⁿ yā castigar nducyaaca 'iiⁿyāⁿ chi sta'á yā chi cuuvi daiyá yā. ⁷ Maaⁿ ní cuchεε nī castigo chi Ndyuūs itée yā ndís'tiī ti Ndyuūs ní chiidá nī. Taachi n'geenú nī ngiī tuu'mi ní deenú nī chi diíⁿ yā ndúúcū ndís'tiī tan'dúúcā chi ndís'tiī ní daiyá yā. 'Tíicā diíⁿ yā. ¿Dú'ū daiyá yā vεε chi chiidá yā nguéé idiíⁿ yā castigar? ⁸ Nduuti chi Ndyuūs nguéé diíⁿ yā castigar ndís'tiī tan'dúúcā chi diíⁿ yā castigar nducuéⁿe daiyá yā, tuu'mi ní ndís'tiī nguéé maaⁿ daiyá yā ti ndís'tiī ní daiyá yeⁿe táámá yā. Ní nguéé daiya Dendyuūs ndís'tiī. ⁹ Ní 'tiicá ntūūⁿ chiida yú chi yeⁿe iⁿyeeⁿdí 'cūū diíⁿ yā castigar s'uuúⁿ tan'dúúcā chi neⁿé yā. Ní s'uuúⁿ ní dinéⁿe yú chiida yú. N'daacā ca chi diiⁿ yú chiīⁿ chi neⁿe Ndyuūs chi canéé na va'ai cheeti nguuvi ní sндуuchi yú. ¹⁰ Chiida yú chi yeⁿe

in'yeeⁿdí 'cūū diíⁿ yā castigar s'uuúⁿ dúuⁿvī nduuyū nūuⁿ tan'dúúcā chi tumicadínuuⁿ yā chi n'daacā caavā s'uuúⁿ. Ndyuūs yeⁿe yú ní diíⁿ yā castigar s'uuúⁿ ti cuáácú chí n'dai caavā s'uuúⁿ ti s'uuúⁿ ní cuuvi din'dai ca yú tan'dúúcā chi Ndyuūs ní n'dai cá yā. ¹¹ Cuaacu chi nguéeⁿ yeenu yú taachi téē yā castigo s'uuúⁿ naati yá'ai yú. Cuayivi ní 'iiⁿyāⁿ chi tuumicádínuuⁿ yā yeⁿē castigo yeⁿé yā ni vééⁿ chi n'daacā yeⁿe castigo. 'Iiⁿyāⁿ s'eeⁿ din'daacā cá yā ní canéeⁿ 'diiⁿ vida yeⁿé yā.

Véé peligro yeⁿē yú nduuti chi nguéeⁿ n'giindiveeⁿ yú nduudu yeⁿé Ndyuūs

¹² Maaⁿ ní Ndyuūs 'āā tee yā castigo ndís'tiī ní maaⁿ ní cuta'á nī fuerzas ndúúcū ta'á nī ní dicuaacú nī duūⁿntiī'yā nī chi ndicuūnū. ¹³ Cachiicá nī ná yúúni cuaacu maaⁿ ní 'íicú cuuvi nanduūvā yeⁿé nī ca'a nī chi ndíi dúúvā yeⁿe nī.

¹⁴ Maaⁿ ndís'tiī ní diíⁿ nī chi 'diiⁿ 'cuεεtinée nī ndúúcū nducyaaca 'iiⁿyāⁿ. Ní diíⁿ nī nducuéⁿē chi n'daacā ca caati δεενε canéeⁿ vida yeⁿé nī. 'Iiⁿyāⁿ chi nguéeⁿ δεενε vida yeⁿé yā nguéeⁿ cuuvi n'diichí yā Señor Ndyuūs. ¹⁵ Cundéeⁿ nī cuidado chi mar 'áamá ndís'tiī nguéeⁿ divi nī yeⁿe Ndyuūs ti nguéeⁿ cuuvi inneé yā ndís'tiī. Ní nguéeⁿ cúúví cunee 'aamá nī nguaaⁿ ndís'tiī chi tan'dúúcā 'áamá diiⁿyu yaātā yaāa chi diiⁿ daño yeⁿe nducuéⁿē diiⁿyu yaātā. 'Tíicā cuuvi diiⁿ daño 'áamá nī tan'dúúcā chi veneno nguaaⁿ ndís'tiī. ¹⁶ Candéeⁿ nī cuidado chi mar 'áamá ndís'tiī nguéeⁿ caⁿ'á nī ndúúcū n'daataa o saⁿ'ā chi nguéeⁿ yeⁿe nī. Ní nguéeⁿ diíⁿ nī cuenta yeⁿe nducuéⁿē chi yeⁿé Ndyuūs. 'Tíicā diiⁿ saⁿ'ā Esaú

ti cáávā 'áámá comida nūuⁿ n'diicuí sá chi cuuvi yeⁿe sa ti saⁿ'ā vmnaaⁿ. ¹⁷ Ní ndís'tiī deenú nī yeⁿe saⁿ'ā Esaú taachi neⁿe sa cuta'a sa yeⁿe chiidá sa chi cuuvi yeⁿ'ē sa ti saⁿ'ā daiya vmnaaⁿ, naati nguéeé 'cuūⁿ chiida sa. Ní Esaú chεεcū taavi sá ní n'nuuⁿ sa manera chi nduuvi n'daacā chi 'āā diiⁿ sa naati nguéeé ndaācā n'daaca sa.

¹⁸ Maaⁿ ní ndís'tiī nguéeé ndáa nī na yiīcū chi ngiichi chi diiⁿ nī sentir ngiichi miiⁿ, tan'dúúcu chi diiⁿ 'iiⁿ'yāⁿ Israel tiempo chi 'āā chó'ōo. Ndíí nguéeé diiⁿ nī sentir maāiⁿ, ndíí nguéeé ndúú meēeⁿ, ndíí nguéeé ndúú 'áámá cheeⁿ cúúvī díítūu. ¹⁹ Ní nguéeé n'giindiveéⁿ nī chi ch'εεcū trompeta miiⁿ ní nguéeé nduudu yeⁿ'é Ndyuūs chi caⁿ'a yā ndúúcu 'iiⁿ'yāⁿ s'eeⁿ. Taachí 'iiⁿ'yāⁿ s'eeⁿ ch'iindiveéⁿ yā nduudu yeⁿ'e Ndyuūs chiica yā Ndyuūs chi 'āā ntéé caaⁿ'maⁿ cá yā 'iiⁿ'yāⁿ s'eeⁿ. ²⁰ 'Tíicā ngaⁿ'a yā ti nguéeé cuuvi chεε yā chi Ndyuūs ngaⁿ'a ntiiⁿ'nyuⁿ yā ti 'tíicā: Ndúúti chi 'áámá 'iiti nindaá tī na yiīcu 'cūū canee chi cuiutuú yā 'iiti ní 'caaⁿ'núⁿ yā 'iiti. ²¹ Ní maaⁿ Moisés miiⁿ ní taachi n'diichí yā yiīcu 'cūū ní ch'iindiveéⁿ yā nducuéⁿ'ē, 'tíicā ngaⁿ'á yā: Néené 'va'á ní yiin'duuvi 'úú.

²² Maaⁿ ní nguéeé 'tíicā ti ndís'tiī ndaa nī 'áámá yiīcū chi nguuvi Sión chi yāāⁿ yeⁿ'e Ndyuūs chi cánduuchi chí yāāⁿ Jerusalén chí va'ai chεεti nguuvi naachi n'dee n'dái miles ángeles snée yā. ²³ Ní nduuvidaamá yā chi dich'εεté yā Ndyuūs. Ní miiⁿ canee nducyaaca 'iiⁿ'yāⁿ chi daiyá Ndyuūs. Ní chi duuchí yā canéé nguūⁿ na libro yeⁿ'ē va'ai chεεti nguuvi. Nducyaaca nī ndaa nī nanááⁿ Ndyuūs chi diiⁿ yā juzgar nducyáácá 'iiⁿ'yāⁿ. Ní ndís'tiī chi yeⁿ'ē in'yeeⁿ'dí 'cūū ní ndaa nī nanááⁿ espíritu

s'eeⁿ yeⁿe 'iiⁿyāⁿ chi δεε^{vε} ca chi Ndyuūs diⁿ yā chi nguéeⁿ nuuⁿndi yeⁿ'é yā. ²⁴ Ní ndaá nī nanááⁿ Jesucristo chi abogado chi canúⁿ yā naavtaⁿā compromiso chí ngai chi yeⁿ'é Ndyuūs ndúúcū 'iiⁿyāⁿ. Ní ndaá nī nanááⁿ Cristo chi chingée yā yuūⁿ yeⁿ'é yā cucáāvā s'uuúⁿ. Yuūⁿ yeⁿe Cristo ní n'daacā ca nguéeⁿ ti yuūⁿ yeⁿe Abel. Ndúúcū yuūⁿ yeⁿe Cristo, Ndyuūs nadich'εε^{cú} yā nuuⁿndi yeⁿe 'iiⁿyāⁿ. Naati cáāvā 'díinu Abel ch'iiⁿ'núⁿ Abel tuuⁿmi ní Ndyuūs ca'a yā castigo 'díinu Abel.

²⁵ Ní cáāvā nducuéⁿē chuū candéeⁿ nī cuidado chi n'giindiveéⁿ nī nduudu yeⁿe Ndyuūs chi ngaⁿ'á yā ngī yā ndís'tiī. 'Iiⁿyāⁿ s'eeⁿ chi nguéeⁿ ch'iindiveéⁿ yā nduudu yeⁿe Cristo taachí snée yā iⁿ'yeeⁿdí 'cūū nguéeⁿ nguaⁿ'ái yā yeⁿ'ē nuuⁿndi yeⁿ'é yā. Ní 'tεε cá s'uuúⁿ chi cuuvi nguaⁿ'āi yú nduuti chi ndaacadaami yú yeⁿ'é Cristo chi canee na va'ai cheeti nguuvi ní ngaⁿ'á yā ndúúcū s'uuúⁿ yeⁿe chi cuchiī. ²⁶ Tiempo chi chó'ōo taachi Ndyuūs ngaⁿ'á yā yeⁿe yiīcū nuⁿ'u yáⁿ'āa. Maaⁿ ní Ndyuūs ngaⁿ'á yā 'tíicā: Taama vmnéⁿ'ēe inuⁿ'ú yáⁿ'āa ndúúcū nanguuvi. ²⁷ Maaⁿ ní taachi ngaⁿ'a Ndyuūs taama vmnéⁿ'ēe nūⁿ deenu yú chi nducuéⁿē chi din'dái Ndyuūs ní caⁿ'á yā din'núⁿ'u yā ní diví yā. Ní nducuéⁿē chi nguéeⁿ din'núⁿ'u yā ní cūnee. ²⁸ Canée chí ca'a yú gracias Ndyuūs caati véé yāāⁿ yeⁿe yú, lugar naachi Ndyuūs ngaⁿ'a ntiiⁿnyuⁿ yā. Ní nguéeⁿ cuuví nuⁿ'u lugar miiⁿ. Canee chi dich'εε^{te} yú Ndyuūs ní i'teenu yú Ndyuūs. Ní 'va'a yú yeⁿ'é yā ní diiⁿ yú tan'dúúcā chi neⁿe yā. ²⁹ Ndyuūs yeⁿe yú tan'dúúcā 'áamá nguuchi yáⁿ'ā chí dituūví nducuéⁿē chi nguéeⁿ n'daacā. Tiicá yā.

13

Ye' é chi dii' yú chi cunee yiinuú Ndyuūs

¹ Canéé chi dineⁿe yú 'aama yú taama yú caati hermanos s'uuúⁿ ní yeⁿe Cristo s'uuúⁿ.

² Nan'gaacu yú chi canee chi ca'a yú va'āi yeⁿe yú 'iiⁿ'yāⁿ chi canúúⁿ yúúⁿí. N'duuvi yā ní diiⁿ yā 'túúcā ní sta'á yā va'ai yā ángeles ní nguéé déénu yā chi ángeles.

³ Nan'gaacu yú yeⁿe 'iiⁿ'yāⁿ chi snúúⁿ yā vácūū. Diiⁿ yú cuenta chi s'uuúⁿ snuūⁿ yú vácūū nduucú yā. Nan'gaacu yú yeⁿe 'iiⁿ'yāⁿ chi n'geenú yā ngii na cuerpo yeⁿ'é yā ní diiⁿ yú cuenta chi s'uuúⁿ ní n'geenu yú ngii na cuerpo yeⁿe yú nduucú yā.

⁴ Diiⁿ yú respetar 'iiⁿ'yāⁿ chi n'giindivaacú yā ti nguéé dinuuⁿndí yā. 'Iiⁿ'yāⁿ chi n'giindivaacú yā canee chi caⁿ'á yā dámaāⁿ ndúúcū isaⁿ'ā o n'daataá yeⁿ'é yā. Ndyuūs ní n'diichí yā nuuⁿndi yeⁿe 'iiⁿ'yāⁿ chi véé nuuⁿndi yeⁿ'é yā ndúúcū 'iiⁿ'yāⁿ chi n'giindivaacú yā ní caⁿ'á yā ndúúcū táamá n'daataá o saⁿ'ā.

⁵ Nguéé dineⁿe yú tuūmī naati yeenú yú ndúúcū chi véé chi yeⁿe yú ti Ndyuūs ngaⁿ'á yā 'tíicā: 'Úú nguéé cu'neéⁿ ndís'tiī ní nguéé diiⁿ abandonar ndís'tiī. ⁶ Ní 'tíicā cuuvi caaⁿ'maⁿ cuaacu yú ndúúcū confianza:

Señor ní nginne^e yā 'úú. 'Úú nguéé 'va'á yeⁿe chi 'iiⁿ'yāⁿ cuuvi diiⁿ yā nduucú.

⁷ Nan'gaacú nī yeⁿe 'iiⁿ'yāⁿ n'gεεte yeⁿe yaācū chi ngaⁿ'a ntiiⁿnyúⁿ yā nanááⁿ ndís'tiī ní ngaⁿ'á yā ngii yā ndís'tiī nduudu cuaacu yeⁿ'é Ndyuūs. Nada-cadínuuⁿ nī táaca 'iiⁿ'yāⁿ s'eeⁿ diiⁿ yā ní n'gεεtineé yā ní ch'iī yā. Maaⁿ ní candée nī cuidado chi diiⁿ nī

tan'dúúcā 'iiⁿyāⁿ n'gεεε chi i'téenu yā Ndyuūs diⁿ yā ti 'iiⁿyāⁿ s'eeⁿ ejemplo yeⁿ'é nī.

⁸ Jesucristo miiⁿ ní 'āā 'tiicá nūuⁿ tan'duucá yā 'iicu, 'tiicá ntúuⁿ yā maaⁿnguuvī. 'Āā 'tiica nuúⁿ yā cueⁿ'e daāⁿmaⁿ. ⁹ Cuin'diichí nī ndís'tiī. Nguéé 'caandiveéⁿ nī ndúúúú 'naⁿ'a chi n'dááⁿ ndúúúú yeⁿ'ē chi che'e yú. N'daacā ca chi staava yeⁿ'é nī canéé n'daacā chi cuuvi cuta'á nī fuerzas yeⁿ'ē nducuéⁿ'ē chi n'dai taavi chi Ndyuūs itée yā ndís'tiī. Staava yeⁿ'é 'iiⁿyāⁿ nguéé diiⁿ aprovechar nduuti chi chiindiveéⁿ yā nduudu n'dááⁿ ndúúúú yeⁿ'e chi che'e yú.

¹⁰ Deenu yú chi chiiduú s'eeⁿ chi diⁿ yā ntiiⁿnyuⁿ yeⁿ'e yaācū yeⁿ'é yā nguéé cuuvi che'é yā yuūtē yeⁿ'e nátaí yeⁿ'e 'iiti chi ch'iiⁿ'núⁿ yā cáávā ofrenda yeⁿ'e yú ti ofrenda yeⁿ'e yú ní 'āā vi'í caā ti i'teenu yú Jesucristo. Ní Jesucristo miiⁿ ní ch'iī yā chi lado yeⁿ'e ofrenda yeⁿ'e yú. ¹¹ Chiiduú ch'εεε ca yeⁿ'e judíos chi Israel s'eeⁿ taachi ch'iiⁿ'núⁿ yā 'iiti cáávā ofrenda yeⁿ'e nuūⁿndī candéε yā yuūúⁿ yeⁿ'é 'iiti chεεti cuarto chi nguuvi DεεVε naati cuerpo yeⁿ'ē 'iiti miiⁿ ní ngiichí yā 'áámá lado yeⁿ'ē yāāⁿ yeⁿ'é yā. ¹² Ní 'tiicá ntúūⁿ Jesucristo ch'iī yā cuaaⁿ dáámí cheendi va'āi yeⁿ'e yāāⁿ Jerusalén ní 'iícú cuuvi dεεVé yā 'iiⁿyāⁿ yeⁿ'e nuuⁿndi yeⁿ'é yā ndúúúú yuúúⁿ yeⁿ'e maán yā. ¹³ Maaⁿ ní caⁿ'a yú tan'dúúcā chi cueⁿ'e Jesús 'áámá lado yeⁿ'ē yāāⁿ ní 'cueenu yú cuuvi tan'dúúcā chi ch'eenú yā chiī ní cuuvi 'cuinaaⁿ yú tan'dúúcā chi 'cuinaáⁿ yā. ¹⁴ Caati nguéé véé 'áámá yāāⁿ chi 'áámá cūnee cáávā s'uuúⁿ naati in'nuuⁿ yú 'áámá yāāⁿ ch'εεε chi 'áámá cūnee chi véé tiempo chi cuchī. ¹⁵ Ní cáávā chuū canee

yú chi dich'εεε yú Ndyuūs cucáávā Jesucristo. Ní taachi dich'εεε yú Ndyuūs chuū ní ofrenda chi canee chi ca'a yú Ndyuūs. Ní canéé chi ca'a yú gracias Ndyuūs cáávā Jesucristo ndúúcū nduudu yeⁿē yú. ¹⁶ Nguéé cuuvi 'náaⁿ nī chi din'daacá nī ní nneé nī 'aamá nī taamá nī caati chuū ní ofrenda yeⁿé nī chi 'túúcā Ndyuūs neⁿe yā.

¹⁷ Cu'neeⁿveéⁿ nī nduudu yeⁿé 'iiⁿyāⁿ chi ngaⁿa ntiiⁿnyuⁿ yeⁿé nī. Cu'tééⁿu nī yeⁿé yā chi ngaⁿa yā caati 'iiⁿyāⁿ s'eeⁿ diíⁿ yā cuidado yeⁿē staava yeⁿé nī. 'Iiⁿyāⁿ s'eeⁿ canéé chi nca'á yā cuenta nanááⁿ Ndyuūs yeⁿē ntiiⁿnyuⁿ chi diíⁿ yā. Diiⁿ núúⁿ yiiⁿnu nī chi ngaⁿa yā caati yeenú yā diíⁿ yā ntiiⁿnyuⁿ yeⁿé yā. Tí nduuti chi nguéé diíⁿ nī 'túúcā nguéé yeenú yā ní nguéé diíⁿ nī aprovechar yeⁿē ntiiⁿnyuⁿ chi diíⁿ yā cáávā ndís'tiī.

¹⁸ Maaⁿ ní caaⁿ'maⁿngua'á nī cáávā nús'uu ti nadacadiinúúⁿ 'nū n'daacā na staava yeⁿé 'nū ní neⁿé 'nū 'cuεεtinéé n'daacá 'nū yeⁿe ndu-cuéⁿē dendu'ū. ¹⁹ 'Úú ngiicá ndís'tiī chi taachi ngaⁿ'angua'á nī, ngiicá nī Ndyuūs chi téé yā lugar 'nū chi niiⁿnuúⁿ nūⁿ cuuví nandaá ní cuneé ndúúcū ndís'tiī.

Dì'viicú yā ndís'tiī ní dicho'ó yā, n'dai ndís'tiī

²⁰ Maaⁿ ní Ndyuūs ní yeⁿē vaadī 'diiⁿ, maaⁿ Ndyuūs miiⁿ nadin'duuchí yā Jesucristo yeⁿē yú yeⁿē nguaaⁿ tináⁿā chi Jesucristo miiⁿ Pastor chi ch'εεε n'dai chi diíⁿ yā cuidado s'uuúⁿ chi tan'dúúcā 'iiti cuūchī yeⁿé yā. Ní Jesucristo yeⁿē yú ndúúcū yuūúⁿ yeⁿé yā diíⁿ yā chi 'áamá cūnee compromiso chi Ndyuūs diíⁿ yā ndúúcū 'iiⁿyāⁿ.

²¹ Neⁿé chi Ndyuūs yeⁿe vaadī 'diiⁿ téé yā ndís'tiī

nducuéⁿē chi n'dai yeⁿ'é yā chi nguéeⁿ yeⁿ'é nī. Ní cuuvi n'daí nī ti ndís'tiī cuuvi diíⁿ nī chiiⁿ chi neⁿ'é Ndyuūs chi diíⁿ nī. Ní neⁿ'é chi Ndyuūs diíⁿ yā cáávā nducyaaca yú nducuéⁿē chi neⁿ'é yā diíⁿ yā cáávā Jesucristo. Caⁿ'a yú chi ch'εεε ca canée Cristo ní n'dεεvé ngii yā cuéⁿ'é daāⁿmaⁿ cueⁿ'e daāⁿmaⁿ. 'Tíicā. ²² Ndís'tiī hermanos yeⁿ'é ngiicá ndís'tiī chí cuchéeⁿ nī ndúúcū nduudu chi ngi'cueéⁿ ti nguéeⁿ 'yaaⁿ idinguúⁿ na carta miiⁿ yeⁿ'é ndís'tiī. ²³ Yaa'ví ndís'tiī chí cadiinúúⁿ nī chí Timoteo hermano yeⁿ'ē yú 'āā ntéeⁿ canee sa vácūū. Ní ndúúti chí niiⁿnuⁿ niiⁿnuⁿ ndaa sa nanáaⁿ 'úú tuu'mi 'úú ní candéeⁿ saⁿ'ā taachi ndaa nanáaⁿ ndís'tiī ní n'diichí ndís'tiī.

²⁴ Maaⁿ ní caaⁿ'máⁿ nī 'iiⁿ'yāⁿ chí ngaⁿ'a ntiinnyuⁿ yeⁿ'é nī ndúúcū nducyaaca 'iiⁿ'yāⁿ chí i'téenu yā Jesucristo: N'daí ndís'tiī, caaⁿ'máⁿ nī. 'liⁿ'yāⁿ yeⁿ'e país Italia: N'daí ndís'tiī, ngaⁿ'a yā.

²⁵ Neⁿ'é chí Ndyuūs téé yā nducyaaca ndís'tiī nducuéⁿē vaadī n'dai yeⁿ'é yā. 'Tíicā cuuvi.

**Nduudu n'dai ye^{n'}e Ndyuūs ye^{n'}e cuicateco
ye^{n'}e Tepeuxila
New Testament in Cuicatec, Tepeuxila
(MX:cux:Cuicatec, Tepeuxila)**

copyright © 1974 Wycliffe Bible Translators, Inc.

Language: Cuicatec, Tepeuxila

Translation by: Wycliffe Bible Translators, Inc.

Cuicateco, Tepeuxila [cux], Mexico

Copyright Information

© 1974, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Cuicatec, Tepeuxila

© 1974, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files
dated 29 Jan 2022

28b090dc-326e-56c7-994e-5d3354d1d54f